

Kalata gwa Pauli ku Balooma Isyakulongosya

Untumigwa Pauli aasimbile kalata ujū ku biitiki abaa nkaaja akaa mu Looma ikyinja kya 56 bo apaapiigwe Jesu, paapo aalondaga ukubalingaania indumi iji aalumbiliile mfiisu ifingi. Ikubalingaania ukuti indumi inunu ijaa Jesu jikunangisya muno Kyala ikubabala ubugolofu abandū abaa mfiisu fyosa ku lwitiko. Ku Bajuuta abiiitiki, ikubalingaania ukuti indumi iji jilimo moope na ndwitikano ulukulu. Kuli aba bakaja Bajuuta ikubanangisya ukuti indumi ijo jikubafwania na Kyala nu kuja bandū baake. Ikulingaania ukuti ku lwitiko Kyala atubalile ubugolofu nkyeni mmyake. Po leelo Kyala atikutubala ubugolofu ku njila jaa kusikonga indagilo syake. Looli linga tukundekela Mbepo Mwikemo ukutulongosya mbuumi bwitu, po aatukutugalaga bo muno Kyala ikulondela.

Kummaliikisyo mwa kalata ujū (ulutulo ulwa 12-15), Pauli ikulingisania akajilo akaa biitiki muno bikulondeligwa ukujā nako mbuumi bwabo. Ikumanyisya isya kubagana abandū abangi. Amaliikiisye (ulutulo ulwa 16) ukubaponia abamanyaani baake abaa mu Looma, ikumponia jumoojumo ku ngamu jaake.

Isi silimo mwa kalata uju

Inongwa isya nsimbi na aba ikubasimbila kalata uju

Kyala ikubabala ubugolofu abandũ ku njila jeene ijaa lwitiki

Imanyisyo isya bũmi ubupya ubwa Bakilisiti

Kyala aabasungwile aBajuuta, aikubapoka

Akajiilo akaa Bakilisiti, ni mbombo jaa Pauli

Uluponio ku biitiki abangi abaa nkipanga kya Kyala

Uluponio

¹ Kalata uju afumile kumyangu une Pauli, ne mbombeli gwa Kilisiti Jesu. Aaliimbilikiile ukũja ntumigwa nu kuusungula ukuti mfumusyeye iNdumi iNunu ijaa Kyala. ² INdumi iNunu ijo, jo iji Kyala aafingile ukufuma liijolo, ku njila jaa bakunguluka baake, bo muno sisimbiigwe mwa Kalata uMwikemo. ³ INdumi ijo ijaa Mwanaake,* uju mbundu bwake aali gwa nkikolo ikya malafyale Ndaabiti.† ⁴ Ujo jo uju Kyala aalinsyusiisye ku maka agaa Mbepo Mwikemo gwake. Ku njila ijo, ansetwile ukũja Mwanaake, uMwene maka goosa. Ujo jo Ntwa gwitu Jesu Kilisiti. ⁵ Ukwendela kumyake, Kyala aalimbeelee iipyana ilya kũja ntumigwa, ukubũuka nkufumunya iNdumi iNunu ku bandũ baa mfikolo fyosa, ukuti bammwitike Kilisiti nu kummwimika, ingamu jaake jituufigwege. ⁶ Umwe nuumwe muli nkibugutila ikyo ikya bandũ aba Jesu Kilisiti ababilikiile ukũja bandũ baake.

* **1:3** 1:3 UMwanaake Bala iisya UMwana gwa Kyala ku Isyakulingaania. † **1:3** 1:3 Ndaabiti Bala ku Isyakulingaania.

⁷ Mbasimbiile umwe mwesa mwe bandu baa mu Looma mwe Kyala abaganile fiijo, nu kubabilikila ukuti muje biikemo.‡ fliipyana nu lutengaano ukufuma kwa Taata Kyala na ku Ntwa Jesu Kilisiti, fijege na nuumwe.

Uluabaatiko lwa Pauli ukubuka ku biitiki abaa mu Looma

⁸ Akaa kwanda, ukwendela mwa Jesu Kilisiti, ngugwa ulupi kwa Kyala gwangu kunongwa jinu umwe mwesa, paapo ulwitiko lwinu lufumwike pakiisu poosa. ⁹ Kyala nkeeti gwangu, uju ngumbombela ni ndumbula jangu joosa, ku njila ijaa kufumusya iNdami iNunu ijaa Mwanaake. Ameenye muno ngubasumila umwe akabalilo koosa. ¹⁰ Ngansuma Kyala bwila, ukuti linga iiganile, mbagiile ukwisa kumyinu. ¹¹ Nsyakilwe fiijo ukubabona, ukuti mbajabile ulusajo ulu lukufuma kwa Mbepo Mwikemo, ukuti mukake ndwitiko lwinu. ¹² Kokuti, ulwitiko lwinu lungasye une, ulwitiko ulwangu lubakasye umwe.

¹³ Baamyitu ndwitiko, ngulonda mumanye ukuti, naalondaga kaa kingi ukwisa kumyinu. Leelo mbingiigwe ukwisa kumyinu mpaka ulu. Ngulonda niise uko koope mfumusye iNdami iNunu, bo ulu mbombile mfiisu fimo, ukuti aband u bammwitike uNtwa Jesu. ¹⁴ Keeta, ngumeleligwa na Kyala, ukufumusya iNdami iNunu ku bandu boosa, ku Bagiliki na ku bandu

‡ 1:7 1:7 Abiikemo Bala ku Isyakulingaania.

aba bakaja Bagiliki,[§] ku bamanyili na kuli aba bakaja bamanyili. ¹⁵ Fyobeene ngunyonywa fiijo ukwisa kukufumusya iNdumi iNunu kumyinu, mwe bandu baa mu Looma.

Amaka agaa Ndumi iNunu

¹⁶ Ndikufwa isoni na panandi ukufumusya iNdumi iNunu ijo, paapo go maka agaa Kyala agaa kubapoka abandũ boosa aba bikummwitika Jesu, ukwandila ku Bajuuta mpaka ku bandu aba bakaja Bajuuta. ¹⁷ INdumi iNunu ijo jisetwile muno Kyala ikubabala ubugolofu abandũ, ku njila jaa lwitiko lwene, bo muno sisimbiigwe mwa Kalata uMwikemo ukuti, “Umundu ugolofu ikutuugalaga ku njila jaa lwitiko lwake.”*

Kyala ikubafunda abandũ kunongwa jaa butulanongwa bwabo

¹⁸ Ingalalisi sya Kyala sisetuliigwe ku bandu boosa ukufuma kumwanya. Ikwisa kubafunda abandũ aba ku njila jaa bubiibi bwabo, bikubupinga ubwanalooli ukuti bulingamanyigwa, paapo bikunkaana Kyala nu kubomba fiijo imbiibi. ¹⁹ Kukaja kokuti bakasimanya nasimo isya Kyala, namanga isi syali sya kusimanya, sili pawelu, paapo Kyala juujo asisetwile ku bandu boosa. ²⁰ Ukwandila

§ **1:14** 1:14 Ku Bagiliki na ku bandu aba bakaja Bagiliki Akabalilo aka aasimbiigwe kalata uju, injobelo ijaa Kigiliki ni nyiiho sya Bagiliki syabombigwaga mfiisu fingi. Abandũ aba bakaja Bagiliki bo aba bakajimanya injobelo iji, bakaakongaga inyiiho isya Bagiliki. Aba bakiimikigwaga. * **1:17** 1:17 Bala kalata gwa Habakuki 2:4.

akabalilo aka Kyala aapelile ikiisu, abandu babagiile ukumanya Kyala muno ajiliile. Na paapo batikummbona, bameenye ukuti ali na maka agaa bwila na bwila, na kuti mwene jo Kyala, akajako ujungi. Abandu babagiile ukumanya ku njila jaa ifi afipelile, fyobeene abandu bakaja ni fya kwinkesya ukuti bakamanya. ²¹ Na paapo bammeenye Kyala, poope batikuntuufya pamo ukunngwila ulupi bo muno bikulondeligwa. Looli bali ni nyiinogono isya mwalo, ni ndumbula syabo sya bukonyofu buturu. ²² Abeene bikwijumbika ukuti bali na mahala, ngimba bakonyofu. ²³ Balekile ukummwipuuta Kyala uju atikufwa, bikwipuuta ku fifwani ifi fifwene na bandu, ni fya finyamaana ifya luko na luko, ifi fyosa fikufwa.

²⁴ Kunongwa ijo, Kyala abalekile ukuti babombege isi bikulonda, ukukonga ifinyonyo fyabo ifinyali na kubombanila ingosya soni ni mibili gyabo. ²⁵ Balekile ukubwitika ubwanalooli ubwa Kyala, bikukonga imanyisyo isya butungulu. Bikufibombela na kufipuuta ifipeligwa, looli balekile ukummwipuuta uMpeli, uju abagiisye ukutuufigwa bwila na bwila! Amen.

²⁶ Kunongwa ijo, Kyala abalekile, ukuti balongosigwege ni finyonyo fyabo ifikosya soni. Boope na bakiikulu balekile ukubombela imibili gyabo na banyambala, looli kubombelana baabo kwa baabo. ²⁷ Bubuubo na banyambala boope, balekile ukubombela imibili gyabo ku bakiikulu, bikunyonywana baabo kwa baabo.

Abanyambala bikubombelana ingosya soni. Ku njila ijo biisaliile muno bikwisa kufundigwaga ku mbombo syabo imbiibi. ²⁸ Ukongelapo pali isyo, bo ulu abandu abo bakaanile imanyisyo sya Kyala, joope Kyala abalekile ukuti baje na mahala aga gabolile loosa, babombege imbombo isi sikabagisya ukubombigwa. ²⁹ Biiswile ububiibi ubwa luko nu luko, ubunyali, ubuufi na kabini. Biiganile ukugoga, ukumana, ukutungulupa, ukusofania abandu, nu kuheeha. ³⁰ Kangi boohesi, bikunkalasya Kyala, batikupaasya abinaabo, kangi bali na matingo nu kwijumbika. Akabalilo koosa bikulonda injila imbya ijaa kubomba ubutulanongwa, batikubiimika abapaapi baabo. ³¹ Kangi bakaja na mahala, bakaja baa kusubiligwa, bakaja nu lugano, bakaja ni kisa. ³² Na paapo abandu abo bameenye fiijo ukuti, Kyala ikwisa kubalanga ukufwa abandu aba bikubomba imbiibi isyo, poope batikupaasya! Bikwendelela ukubomba imbiibi kisita kutiila nafimo, kangi bikubatuufya abandu aba bikubomba imbiibi sisiisyo.

2

Ubulongi bwa Kyala bwa bugolofu

¹ Po mwinangu ugwe, gwe kubalanga abanino, ukaja nasyo isya kwinokesya, nalinga gwe gwani. Paapo linga kumndonga unniino, po kwilonga jujugwe, paapo nungwe ubombile imbiibi sisiisyo. ² Tumeenye ukuti ubulongi bwa Kyala bwa bwanalooli, ku bandu aba bikubomba imbombo imbiibi bo isyo. ³ Po gwe mwinangu,

linga kũndonga unino looli nungwe kubomba imbiibi sisiisyo, ulinginogonaga ukuti Kyala aikukuleka kisita kukulonga. ⁴ Kyala nnunu, kangi ikukupaakisya fiijo nu kukukeetelela. Keeta kummwilaamwa? Bule, ukamanya ukuti ubununu bwa Kyala bukukupela ukuti upinduke?

⁵ Looli paapo uli na matingo, kangi kukaana ukupinduka, kwilundikila ulufundo ulunywamu, pakabalilo aka Kyala ikwisa kusetula ingalalisi syake nu bulongi ubwa bugolofu. ⁶ Iisiku ilyo, "Kyala ikwisa kunhomba kukuti mundu ukukongana ni mbombo syake."*

⁷ Ikwisa kubapa ubuumi bwa bwila na bwila, aba bikwijwula ukubomba inunu, paapo bikulonda ubusisya, ulwimiko nu buumi ubo ukufuma kwa Kyala. ⁸ Looli abaa kabini na aba bikubukaana ubwanalooli, nu kukonga imbiibi, Kyala ikwisa kubakalalila nu kubafunda fiijo. ⁹ Kukuti mundu uju ikubomba imbiibi ikwisa kutaamigwa nu kukaba ingubilo, ukwandila ku Bajuuta, mpaka ku bandu aba bakaja Bajuuta. ¹⁰ Looli boosa aba bikubomba inunu, Kyala ikwisa kubapa ubusisya, ulwimiko nu lutengaano, ukwandila ku Bajuuta, mpaka ku bandu aba bakaja Bajuuta. ¹¹ Namanga Kyala ikubombela ikipimilo kilakila ku bandu boosa.

¹² Abandu aba bakasimanya indagilo sya Moose, linga bikubomba imbiibi, bikwisa kupyutigwa kisita ndagilo isyo. Looli aba basimeenye indagilo sya Moose, kokuti aBajuuta,

* 2:6 2:6 Bala kalata gwa Isabuli 62:12.

linga bikubomba imbiibi, bikwisa kulongigwa ukukongana ni ndagilo isyo. ¹³ Aba Kyala ikwisa kubabala ubugolofu, bo aba bikubomba isi indagilo sya Moose sikulagila, somma aba bikupilika indagilo isyo kisita kubomba. ¹⁴ Namanga abandũ aba bakaja Bajuuuta bakaja ni ndagilo isyo. Looli linga bikubomba inunu ukukongana ni nyiiho syabo, inunu isyo linga sifwene na isi sikulagila indagilo, bikunangisya ukuti basimeenye kilingaani indagilo isyo, nalinga bakaja nasyo. ¹⁵ Imbombo syabo sikanangisya ukuti indagilo isyo sisimbiigwe mu ndumbula syabo. Indumbula syabo bukeeti, kangi inyiinogono syabo lamo sikubasitaaka, lamo sikubanosya. ¹⁶ Sikwisa kũja bo ulo pi isiku lya bulongi. Kyala ikwisa kubalonga abandũ mu nyiinogono syabo isya mbutiitu ukwendela kwa Kilisiti Jesu. INdũmi iNunu iji ngũjifumusya bo jili.

ABajuuta ni ndagilo sya Moose

¹⁷ Po ugwe gwe kuti uli Njuuta, kusubila indagilo, kangi kwituufya ukuti ummeenye Kyala, ¹⁸ ugwe umanyisiigwe indagilo, ugwe ubumeenye ubwigane bwa Kyala, nu kusyagania inunu. ¹⁹ Ugwe kwibona ukuti ubagiisye ukubalongosya abafwa maaso bala, aba bakasi-manyisa isyo, nu kũja nyaale jaa kubamulikila abandũ mu ngiisi. ²⁰ Ugwe gwe mmanyisi gwa aba bakaja na mahala, uli mmanyisi gwa baana abafyele, kwibona ukuti indagilo sikupeele ukumanya nu bwanalooli. ²¹ Ugwe kubamanyisya abangi, fiki utikwimanyisya?

Kubamanyisya abangi ukuti balingiibaga, keeta ugwe kwiba? ²² Ugwe kubabwala abandũ, kuti, “Mulingalogwaga,” keeta ugwe kalogwa? Kangi ubagiile baleebule ukubakalalila aba bikwipu-uta ku fifwani, bo jujugwe kwikabisya nkũhija utundu utwa nnyumba isya kwipuutilamo ku fifwani? ²³ Ugwe kwituufya ukuti usimeenye indagilo sya Kyala, keeta ugwe kunsũsya Kyala ku njila jaa kukilania indagilo syake? ²⁴ Bo muno sisimbiigwe mwa Kalata uMwikemo ukuti, “Kunongwa jaa kajiilo kiinu, ingamu jaa Kyala jikutukigwa na bapanja.”†

²⁵ ABajuuta boosa abanyambala bikubutigwa kũkyeni.‡ Uko kũli ni fya kukabamo kũmyako, linga kusikonga indagilo. Looli linga umundũ akileenie indagilo, ukubutigwa kwake kukaja ni fya kukabamo. Ujo afwene nu mundũ ujũ akabutigwa kũkyeni. ²⁶ Po umundũ ujũ akabutigwa kũkyeni, linga ikusikonga indagilo, Kyala ikũmmwitika bo ulwa mundũ ujũ abutitigwe kũkyeni. ²⁷ Kangi umundũ ujũ akabutigwa kũkyeni, linga akongile muno sikũjobela indagilo, imbombo syake inunu sikũnangisya ukuti umwe mwe Bajuuta muli batulanongwa. Namanga mubutitigwe kũkyeni, ni ndagilo muli nasyo, looli mutikusikonga.

²⁸ UŊjuuta gwa nalooli ali baleebule? Akaja jo ujũ abutitigwe kũkyeni! Ukubutigwa kũkyeni fyo fiki? Kutikubombigwa mu mbili! ²⁹ UŊjuuta

† 2:24 2:24 Bala kalata gwa Jeesa 52:5; Eseyeli 36:20-22.

‡ 2:25 2:25 Ukubutitigwa kũkyeni Bala ku Isyakulingaania.

gwa nalooli, jo uju ikuntiila Kyala mu ndumbula jaake. Koope ukubuutigwa kukiye ni ukwa nalooli, ko kuno kukutendekesigwa mu ndumbula. Uko kukubombigwa na Mbepo Mwikemo, komma na masyu agaa ndagilo. Umundu uju abuutiigwe mu ndumbula ikukaba ulwimiko ukufuma kwa Kyala, atikusubila ulwimiko ukufuma ku bandu. §

3

Ubugolofu bwa Kyala

¹ Pamo kundaalusya ukuti, “Kukabamo ifiki ukujja Njuuta? Bule, ukubuutigwa kukiye ni kuli ni fya kukabamo?” ² Nalooli ukujja Njuuta kukabamo ku njila nyingi. Akaa kwanda, Kyala aabapeele aBajuuta amasyu gaake. ³ Looli sya nalooli aBajuuta bamo bakaali bagolofu. Bule, kokuti ubugolofu bwa Kyala busobile? ⁴ Himma na panandi! Nalinga abandū boosa batungulu, Kyala ngolofu. Bo muno sisimbiigwe mwa Kalata uMwikemo ukuti, “Mmasyu gaako kubonekaga ukujja ngolofu, Linga bikukulonga, kutolaga.”*

⁵ Bamo bikujoba bikuti, “Imbiibi syitu nunu paapo sikunangisya ukuti Kyala ngolofu.” Bule, tukutigi akaja ngolofu bo ikutafunda? ⁶ Himma na panandi! Paapo linga sili bo ulo, po Kyala ikwisa kubalanga buleebule abandū abaa pakiisu apa ku bugolofu? ⁷ Kangi bamo babagiile ukulaalusya ukuti, “Linga ubusyobi

§ 2:29 2:29 Bala kalata gwa Ukukumbuka Ingomeelesyo 30:6.

* 3:4 3:4 Bala kalata gwa Isabuli 51:4.

bwitũ bukutuula ukunangisya ubwanalooli ubwa Kyala nũ kongelapo ubasisya bwake, fiki uswe tukulongigwa ukũja batulanongwa?”⁸ Uko kufwene nũ kuti, “Tubombege imbiibi ukuti siise inunu!” Abandũ bamo bikuti, nuuswe tukumanyisya bo ulo. Po abandũ abo bikwisa kufundigwa ukukongana ni mbiibi syabo.

Akajako umundũ ungolofu

⁹ Po leelo tuti fiki? Bule, uswe twe Bajuuta tũli banunu ukubakinda aba bakaja Bajuuta? Himma na panandi! Namanga mbabũlile kilingaani ukuti aBajuuta na aba bakaja Bajuuta bafwene itolo, boosa bikulongosigwa nũ butulanongwa. ¹⁰ Bo muno sisimbiigwe mwa Kalata uMwikemo ukuti, “Akajako umundũ najũmo ungolofu.

¹¹ Akajako umundũ najũmo ujũ asimeenye isya Kyala, akajako ujũ ikulonda ukusimanya.

¹² Abandũ boosa balekile ukuntiila Kyala, nkyeni mmyake bakabagisya kangi.

Akajako umundũ najũmo ujũ ikubomba inunu.”†

¹³ “Imilomo gyabo gili bo ulwa mapũmba aga gali bwasi, indimi syabo sikujoba ubutungũ.”‡

“Mmilomo gyabo sikusooka inongwa isya kugoga,

bo ulwa kulumigwa ni njoka.”§

¹⁴ “Ubujobi bwabo,

† **3:12** 3:10-12 Bala kalata gwa Isabũli 14:1-3; 53:1-3. ‡ **3:13** 3:13 Bala kalata gwa Isabũli 5:9. § **3:13** 3:13 Bala kalata gwa Isabũli 140:3.

- bwiswile inongwa isya kuguna nu
kufulasya.”*
- 15 “Amalundi gaabo mapepe ukubuka
kukugoga.
- 16 Poosa apa bikuja,
bikufulasya nu kubapelela abandu ingubilo.
- 17 Bakajimanya injila ijaa kutugala ku
lutengaano.”†
- 18 “Batikuntiila Kyala siku.”‡

19 Looli tumeenye ukuti inongwa isi sikufuma
mwa Kalata uMwikemo, sisimbiigwe kuli aba
baapeeliigwe kalata ujo. § Isyo syasimbiigwe
ukuti Kyala bo ikukilonga ikiisu, abandu boosa
balingiisa kujaga ni sya kwinokesya, kangi
siboneke pabwelu ukuti boosa batulanongwa
nkyeni mwa Kyala. 20 Po leelo, akajako umundu
ujū ikubaligwa ubugolofu nkyeni mwa Kyala
ku njila jaa kusikonga indagilo sya Moose.
Imbombo jaa ndagilo ko kubanangisya abandu
boosa ukuti batulanongwa.

*Umundu ikubaligwa ubugolofu ku njila jaa
kummwitika Jesu*

21 Looli akabalilo aka Kyala ajisetwile injila
ijaa kubabala abandu ubugolofu nkyeni
mmyake, kisita kwendela mu ndagilo sya
Moose. Inongwa isyo, indagilo sya Moose na
masimbo agaa bakunguluka gaasisimikiisye.

* **3:14** 3:14 Bala kalata gwa Isabuli 10:7. † **3:17** 3:15-17 Bala
kalata gwa Jeesaja 59:7-8. ‡ **3:18** 3:18 Bala kalata gwa Isabuli
36:1. § **3:19** 3:19 Aba baapeeliigwe kalata ujo bo Bajuuta. Aba
bo aba Kyala aabapeele Kalata uMwikemo.

22 Ƴbugolofu bwa Kyala bwisile ku bandu boosa aba bikummwitika Jesu Kilisiti. Kyala atikwegamila ku mundu, 23 namanga uswe twesa tutulile inongwa, nu kwagilwa ubusisya bwa Kyala. 24 Looli Kyala kwi ipyana lyake, atubalile ubugolofu kisita uswe ukuhomba fimo, ku njila jaa bupoki ubu Kilisiti Jesu atutwaliile. 25 Kyala aalinsoosiisye Kilisiti ukujja ikemo ilya kubooligwa, ukutufwania uswe nu mwene. Kilisiti aalyonile iilopa lyake ku nongwa jaa bandu aba bikummwitika. Kyala aabombile bo ulo, ukunangisya ukuti, umwene ngolofu, kangu ukuti aali ngolofu nalinga akaabafundile abandu ku butalanongwa ubu baabombile akabalilo akaa kunyuma. 26 Kuli isyo, anangiisye ubugolofu bwake nkabalilo aka. Umwene jo ngolofu, kangu jo ujja ikubabala ubugolofu aba bikummwitika Jesu.

27 Po bule, tubagiile ukwituufya? Himma! Bule, tubagiile ukwituukifya ukukonga indagilo sya Moose? Himma! Paapo tukupokigwa kwene ku lwitiko lwitu. 28 Tumeenye ukuti Kyala ikutubala ubugolofu ku njila jaa kummwitika Jesu, somma ku njila jaa kukonga indagilo. 29 Linga kwali ko ku njila jaa ndagilo, Kyala ngali jo Kyala gwa beene aBajuuta. Bule, umwene akaja jo Kyala gwa bandu abangi boope? Nalooli umwene jo Kyala gwa bandu boosa, 30 paapo aliko Kyala jumojwene, ujja ikubabala ubugolofu aBajuuta, aba babuuti-igwe kukyeni, na aba bakaja Bajuuta, aba batikabuutigwa kukyeni. Boosa bikubaligwa

ubugolofu ku njila jaa kummwitika mwene Jesu. ³¹ Po ulu tukusisimikisya ulwitiko, bale, kokuti indagilo sikaja na mbombo najimo? Himma na panandi! Looli ndwitiko indagilo sifikile pa nyango jaake.

4

Aba bikummwitika Jesu ugwisabo jo Abulahamu

¹ Bale, tuti fiki ku sya mwisukulu gwitu Abulahamu,* muno aasimanyiile isya kubaligwa ubugolofu? ² Linga tukuti Abulahamu aabali-igwe ubugolofu ukukongana ni mbombo syake, ngali ali ni sya kwituukifya, leelo akaali nasyo nasimo nkyeni mwa Kyala. ³ Kalata uMwikemo ikuti fiki? Ikuti, “Abulahamu aalimmwitiike Kyala, po Kyala alinkumbala ubugolofu.”†

⁴ Nalooli, umundu linga abombile imbombo, ikupeeligwa umfwalo ukufwana ni mbombo. Atikuhombigwa kisita kubomba. ⁵ Kyala atikumbala ubugolofu umundu uju ikusubila imbombo syake, looli ikumbala ubugolofu untulanongwa uju ikummwitika. ⁶ Umalafyale Ndaabiti joope, aajobile inongwa isya sajo sya mundu uju Kyala ikumbala ubugolofu, kisita kukeeta imbombo syake, aatile,

⁷ “Basajiigwe aba Kyala abahobokiile imbiibi syabo,
nu kubusoosyapo ubutulanongwa bwabo.

* **4:1** 4:1 Abulahamu Bala ku Isyakulingaania. † **4:3** 4:3 Bala kalata gwa Ubwandilo 15:6.

8 Asajiigwe umundu uju uNtwa Kyala atikummbala ukuya ntulanongwa.”‡

9 Bule, isajo isyo, sya beene aba babuutiigwe kukyeni? Kokuti beene aBajuuta! Bule, sikaja sya bandu abangi boope? Kokuti aba bakaja Bajuuta! Mukumbuke isi Kalata uMwikemo ikuti, “Abulahamu aalimmwitiike Kyala, po Kyala alinkummbala ubugolofu.”§

10 Isi syabombiigwe buleebule? Bule, syabombiigwe bo abuutiigwe kukyeni? Himma! Syabombiigwe bo akaali ukubuutigwa kukyeni.*

11 Ukubuutigwa kukyeni kyali kimanyilo ikya kunangisya ubugolofu ubu aali nabo, kunongwa jaa lwitiko lwake, bo akaali ukubuutigwa kukyeni. Ku njila ijo Abulahamu gwise gwa bandu boosa aba bikummwitika Kyala, kokuti aba babaliigwe ubugolofu ku lwitiko, nalinga bakabuutigwa kukyeni. 12 Abandu aba babuutiigwe kukyeni, boope Abulahamu gwisabo ndwitiko, somma kunongwa jaa kubuutigwa kukyeni, looli paapo bammwitiike Kyala bo ulu aalimmwitiike umwene lula, bo akaali ukubuutigwa kukyeni.

Abaa ndujungu lwa Abulahamu bikwisa kukaba ikilingo ikya kiisu kyosa

13 Kyala aafingile kwa Abulahamu na baa ndujungu lwake, ukuti bikwisa kukaba ikilingo

‡ 4:8 4:7-8 Bala kalata gwa Isabuli 32:1-2. § 4:9 4:9 Bala kalata gwa Ubwandilo 15:6. * 4:10 4:10 Bala kalata gwa Ubwandilo 15:6; 17:23-27.

ikya kiisu kyosa.† Leelo batikwisa kukaba ikilingo iki ku njila jaa kukonga indagilo sya Moose, looli ku njila jaa kummwitika Kyala nu kubaligwa ubugolofu. ¹⁴ Linga baakabaga ikilingo ku njila jeene ijaa kukonga indagilo isyo, po ukummwitika Kyala ngali kukaja na mbombo najimo. Apo ulufingo lwa Kyala loope ngali lwa itolo, ¹⁵ paapo indagilo isyo sikututwalila ingalalisi sya Kyala. Kangi linga sikajapo indagilo, po kutikujapo ukukilania indagilo.

¹⁶ Fyobeene ulufingo ulu ulwa Kyala, lukusubila ukummwitika umwene, kokuti lyene iipyana lyake, ukuti ulufingo lwake lwa nalooli ku bandu boosa abaa ndajungu lwa Abulahamu. Somma kwene kuli aba bapeeliigwe indagilo, kokuti abajuuta, looli koope kuli aba bikummwitika Kyala bo ulu aalimmwitiike Abulahamu. Uswa twesa taata jo Abulahamu, ¹⁷ bo muno sisimbiigwe mwa Kalata uMwikemo ukuti, “Ngubiikile ukujja gwisabo gwa fikolo fingi.”‡ Abulahamu jo taata nkyeni mwa Kyala ujja aalimmwitiike, Kyala ujja ikubasyasya abanduu ukufuma mbafwe, kangi ikupela utundu utu tukaalipo, ukujjapo.

¹⁸ Na paapo amasya gaa Kyala gaali makafu ukugasubila, poope Abulahamu aagiitiike, po Kyala aalimmbiikile ukujja jo gwisabo gwa fikolo fingi. Syaboniike bo ulu Kyala aalimmbulile ukuti, “Abanduu abaa ndajungu lwako bikwisa kujja bingi bo ulwa ndondwa.”§

† 4:13 4:13 Bala kalata gwa Ubwandilo 22:1-18. ‡ 4:17 4:17

Bala kalata gwa Ubwandilo 17:5. § 4:18 4:18 Bala kalata gwa Ubwandilo 15:5.

19 Akabalilo kala, Abulahamu aali nkangale gwa fyinja imia jimo bano. Looli ulwitiko lwake lukaalogotiile, na paapo aameenye ukuti umbili gwake gwafwene ngati gufwile, kangi unkasi gwake Sala aali nngumba. ²⁰ Kangi akaali ni ndumbula ijaa kwilaamwa ku lufingo ula aapeeliigwe na Kyala. Looli amaka gaake agaa kummwitika Kyala gaalyongiilepo, kangi antuufyaga, ²¹ namanga aameenye nalooli ukuti Kyala abagiile ukusibomba isi aalimfingiile. ²² Fyobeene Kalata uMwikemo ikuti, “Kyala alinkumbala ubugolofu.”*

²³ Looli inongwa isi sikuti, “Kyala alinkumbala ubugolofu,” sikaja sya Abulahamu mwene, ²⁴ looli syitu na nuuswe, twe Kyala ikutubala ubugolofu, linga tukummwitika umwene, uju aalinsyusiisye uNtwa gwitu Jesu ukufuma mbafwe. ²⁵ Kyala aalinningile Jesu ukufwa, ukuti abusoosyepo ubutulanongwa bwitu. Kangi aalinsyusiisye, ukuti uswe tubaligwe ubugolofu.

5

Utengaano na lusubilo

¹ Po kunongwa jaa kuti Kyala atubalile ubugolofu, ukukongana na kummwitika umwene, tuli na lutengaano nagwe ku njila jaa Ntwa gwitu Jesu Kilisiti. ² Jo uju atulongwisye ndwitiko lwitu, ukwingila mwi ipyana muno tulimo. Muno tukusekela fiijo kunongwa

* **4:22** 4:22 Bala kalata gwa Ubwandilo 15:6.

jaa lusubilo lwitha ulwa kaja na buliilanisi mbusisya bwa Kyala. ³ Sikaja syene sisiisi, looli tukusekela moope mu ngubilo syitu, paapo tumeenye ukuti ingubilo sikongelapo uluumiililo lwitha. ⁴ Uluumiililo lukutwala ukukaka indumbula, ukukaka indumbula kukutwala ulusubilo. ⁵ Ulusubilo ulo lutikutusuisya, paapo Kyala asiiswisye indumbula syitu na lugano lwake, ku njila jaa kutupa Mbepo Mwikemo gwake.

⁶ Kilisiti aaliisile pakabalilo aka Kyala aakabaatiike, alinkutufwila uswe twe tukaja bagolofu, bo tuli batulanongwa. ⁷ Nalooli, kukafu umundu ukumfwila umundu unnunu. Looli pamo umundu abagiile ukumfwila umundu unnunu fiijo. ⁸ Looli Kyala atanangiisye ukuti atuganile fiijo, ku njila jaa kuntuma Kilisiti ukutufwila bo tuli batulanongwa.

⁹ Po linga tubaliigwe ubugolofu ku njila jaa kooneka iilopa Iya Jesu, nalooli ku njila jaa Jesu tukwisa kwepuka ingalalisi ingali isya Kyala, na kupokigwa. ¹⁰ Akabalilo kala, bo tuli balugu baa Kyala, aatufwenie nagwe ku njila jaa bufwe ubwa Mwanaake. Fyobeene nalooli tukwisa kupokigwa ukwepuka ingalalisi sya Kyala, ku njila jaa buumi ubwa Mwanaake. ¹¹ Sikaja bo ulo itolo, looli poope tukusekela mwa Kyala ukwendela ku Ntwa gwitha Jesu Kilisiti, uju atufwenie na Kyala.

Atamu aatwele ubufwe looli Jesu atwele ubuumi

¹² Atamu bo atulile inongwa, ubutulanongwa bwalingiile pakiisa ku njila jaa mundu ujo

jumojwene, bulinkututwalila ubufwe. Fyobeene abandu boosa bikufwa, paapo boosa batulanongwa. ¹³ Moose bo akapeeligwa indagilo, ubutulanongwa bwalipo pakiisu. Looli linga sikajapo indagilo, abandu batikulongigwa ku butulanongwa bwabo. ¹⁴ Poope, ukufuma akabalilo akaa Atamu mpaka nkabalilo akaa Moose, ubufwe bwali na maka ku bandu boosa, boope na bandu aba bakaatulile inongwa ijaa kukilania indagilo, bo ulu aabombile Atamu.

Atamu aali kifwanikisyo ikya Kilisiti ujū aaliisile piitaasi. ¹⁵ Looli ubutulanongwa bwa Atamu, ni ipyana lya Jesu filegeene fiijo. Ukwendela mbutulanongwa ubwa mundu jumojwene, abandu bingi baafwile. Ukwendela mwi ipyana lya mundu jumojwene Jesu Kilisiti, Kyala abongiilepo abandu bingi iipyana ni sajo syake. ¹⁶ Kangi iipyana lila lya Kyala lilegeene nu butulanongwa bwa mundu jula Atamu. Namanga ubutulanongwa bwake bumobwene bwatwele kumyitu ubulongi bwa Kyala. Looli iliipyana lila ilya Kilisiti lyatwele kumyitu ukubaligwa ubugolofu, na paapo twali batulanongwa. ¹⁷ Ukwendela ubutulanongwa ubwa mundu jumojwene, ubufwe bulinkwanda ukaja na maka ku bandu boosa. Looli ukwendela ku mundu jumojwene, Jesu Kilisiti, sya nalooli fiijo, bikatola mbumi bwabo, abandu bala aba bambiliile iliipyana ilingi fiijo nu kubaligwa ubugolofu.

¹⁸ Po leelo, bo ulu abandu boosa bikulongigwa kunongwa jaa butulanongwa bumobwene, bo lululo abandu boosa bikubaligwa ubugolofu

nu kupeeligwa ubuumi kunongwa jaa mbombo jimojeene ijaa bugolofu. ¹⁹ Po leelo, bo ulwa bandu bingi baali batulanongwa, kunongwa jaa mundu jumojwene ujua aalinkaanile Kyala, bo lululo Kyala ikwisa kubapela ukuya bagolofu abandu bingi, kunongwa jaa mundu jumojwene ujua aalintiilile Kyala.

²⁰ Indagilo sya Moose syatwaliigwe ukuti ubutulanongwa bongelepo. Looli ubutulanongwa bo bongeliile, lyope iipyana lya Kyala lilinkukindilila ukongelapo. ²¹ Fyobeene bo ulu ubutulanongwa bwali na maka ukutwala ubufwe, bo lululo iipyana lili na maka ukubabala abandu ubugolofu, nu kubapa ubuumi bwa bwila na bwila, ku njila jaa Ntwa gwitw Jesu Kilisiti.

6

Ukwafwa nu kusyuka pamopeene na Kilisiti

¹ Po tuti fiki? Bule, twendelelege ukubomba ubutulanongwa ukuti iipyana lya Kyala libaalege? ² Himma na panandi! Uwe tukaja nu buliilanisi mbutulanongwa, tafwene bo ulwa bafwe ku butulanongwa. Tubagiile buleebule ukwendelela ukuya mbutulanongwa? ³ Bule, mukamanya ukuti uwe twesa bo toosiigwe, tulungiigwe na Kilisiti Jesu mbufwe bwake? ⁴ Paapo toosiigwe mbufwe bwake, nuuswe tusyiliigwe pamopeene nagwe. Namanga bo ulu Kilisiti aasyukile ku maka amakulumba agaa Kyala, bo lululo nuuswe tukaja nu buumi ubupya.

5 Po linga uswe tubiikiigwe pamopeene nagwe mbufwe bwake, bubuubo tukwisa kusyusigwa ukaja pamopeene nagwe. 6 Nalooli bo toosiigwe, ubundu bwitu ubwa ijolo bwakomeleliigwe pa kikohekano, ukuti ubundu ubwa butulanongwa boomoligwe. Po leelo twalekile ukaja batumwa baa butulanongwa. 7 Namanga umundu linga ubundu bwake ubwa ijolo bufwile, ubutulanongwa butikaja na bulagili kumyake. 8 Linga uswe twafwile bo ulo pamopeene na Kilisiti, tukwitika ukuti aatukaja na buumi pamopeene nagwe. 9 Tumeenye ukuti Kilisiti aasyakile, atikwisa kufwa kangi, ubufwe bukaja na bulagili kangi kumyake. 10 Bo afwile, aafwile kamokeene, kaafwene ukubutola ubulagili ubwa butulanongwa. Akabalilo aka muumi, ubuumi bwake buli mbuliilanisi na Kyala. 11 Bububoo na nuumwe mwibonege ukuti mufwile pamopeene na Kilisiti, ubutulanongwa bukaja na bulagili kumyinu na panandi. Kangi mwibonege ukuti muli buumi mbuliilanisi na Kyala mwa Kilisiti Jesu.*

12 Po leelo mulingabulekaga ubutulanongwa ukugilagila imibili gyinu, igi aagikufwa, pamo ukukonga ifinyonyo fyake ifibiibi. 13 Mulingabombelaga utumbakaasya utwa mibili gyinu ubutulanongwa ni mibiibi. Looli mwiningege kwa Kyala, ukuti mubombelege utumbakaasya twinu isya bugolofu. Namanga musyusiigwe na Kyala, ukuti muje na buumi ubupya. 14 Ubutulanongwa bukaja na bulagili

* 6:11 6:11 Mwa Kilisiti Jesu Bala ku Isyakulingaania.

kumyinu, paapo mukulongosigwa ni ipyana, somma ni ndagilo.

Ukujja batumwa baa bugolofu

¹⁵ Po tuti fiki? Linga tukulongosigwa ni ipyana, somma ni ndagilo, bale tukwitikisigwa ukubomba ubutulanongwa? Himma na panandi! ¹⁶ Bale, mukamanya ukuti linga mwinigile ku mundu jumo ukubomba isi ikulonda, po muli batumwa baake? Mubagiile ukujja batumwa baa butulanongwa nu kufwa, pamo mubagiile ukujja batumwa baa Kyala nu kummwimika umwene, ukuti mubaligwe ubugolofu. ¹⁷ Kyala atuufigwege! Mwali batumwa baa butulanongwa, looli akabalilo aka musikolile mu ndumbula imanyisyo isi mwapeeliigwe. ¹⁸ Mwabuliigwe ukufuma mbutumwa ubwa butulanongwa, muli batumwa baa bugolofu.

¹⁹ Ngujoba nkifwanikisyo iki ikya batumwa, paapo umwe mukaali ukusyagania kanunu. Ijolo mwabombelaga utumbakaasya utwa mibili gyinu, ukujja tutumwa twa bunyali nu bubiibi, ukubomba ubutulanongwa. Looli akabalilo aka utumbakaasya twinu tujege tutumwa twa bugolofu, ukuti muje biikemo. ²⁰ Akabalilo kala mwali batumwa baa butulanongwa, mukaa-longosigwaga nu bugolofu. ²¹ Akabalilo kala, mwabombaga imbombo isi akabalilo aka mukwaga soni. Mwakabilemo ifiki? Isi sikuboneka ndi sila bo bufwe! ²² Looli akabalilo aka, mwabuliigwe ukufuma mbutulanongwa, muli batumwa baa Kyala. Ifya kakabamo ko kujja

biikemo, nu kupeeligwa ubuumi bwa bwila na bwila. ²³ Namanga umfwalo gwa batulanongwa bo bufwe. Looli ifyabupe fya Kyala bo buumi bwa bwila na bwila, ukwendela mu Ntwa gwitu Kilisiti Jesu.

7

Aba bikulongosigwa na Jesu bakaja paasi pa ndagilo sya Moose

¹ Baamyitu ndwitiko, ngujoba na nuumwe, mwe musimeenye indagilo. Mumeenye ukuti umundu ikulondigwa ukusikonga indagilo bo aliko kwene ku buumi. ² Bo ulwa kifwanikisyo ikya lulagilo ulwa bwegi, unkiikulu akabagila ukundeka undume bo akaali muumi. Looli linga undume afwile, po unkiikulu ikwabuligwa ukufuma ndulagilo ulwa bwegi. ³ Kokuti linga ikwegigwa nu nnyambala ujungi bo undume akaali muumi, ujo ndogwe. Looli linga undume afwile, ali nu bwabuke ndulagilo lula. Nalinga ikwegigwa nu jungi, atikuja ndogwe.

⁴ Baamyitu, bubuubo kamyinu, nuumwe mufwile ku ndagilo, muli baabuke ku njila jaa bufwe bwa Kilisiti. Po nuumwe muli baa uju aasyukile ukufuma mbufwe, ukuti uswe twesa tupege iseke inunu kwa Kyala. ⁵ Akabalilo kala, ubundu bwitu ubwa batulanongwa bwatulongosyaga, kangi indagilo syafipelile ifinyonyo ifibiibi ukubomba imbombo mmibili gyitu. Jo nongwa iji twapaga iseke imbiibi isi sikutwala ubufwe. ⁶ Twapinyigwe ni ndagilo, looli akabalilo aka tafwile pamopeene na

Kilisiti, kunongwa ijo tuli baabuke ku ndagilo isi syatupinyaga. Akabalilo aka tutikummbombela Kyala ku njila ijaa ijolo ijaa kukola indagilo isi syasimbiigwe, looli tukummbombela Kyala ku njila imbya ijaa kulongosigwa na Mbepo Mwikemo.

Abandu boosa bikulagiligwa nu butulanongwa

⁷ Po tuti fiki? Bule, tuti indagilo mbiibi? Himma, bukaja bwanalooli na panandi! Nalooli linga indagilo sikaalipo, une ngali ngamanya ukuti ubutulanongwa fyo fiki. Namanga linga lukaalipo ululagilo ulu lukuti, "Ulinganyonywaga akandu akaa nnino,"* une ngali ngamanya ukuti ukunyonywa akandu akaa mwinangu butulanongwa. ⁸ Looli bo nsimeenye indagilo, po ubutulanongwa bulinkufisambula ifinyonyo ifibiibi ifya luko nu luko nkati mu ndumbula jangu. Po linga indagilo sikajapo, ubutulanongwa bukaja na maka. ⁹ Amasiku agaa uko kunyuma, naatugalaga kisita kusimanya indagilo sya Kyala. Looli bo nsimeenye indagilo, ubutulanongwa bulinkuja nu bulagili kumyangu, ¹⁰ ndinkufwa, ndinkusibona indagilo isyo, isi syali sya kumba ubumi, ngimba sikumba ubufwe. ¹¹ Namanga ku njila jaa ndagilo isyo, ubutulanongwa bulinkusyoba une nu kungoga. ¹² Po leelo sili pabwelu ukuti, indagilo sya Kyala nyiikemo, nunu, kangi sya bwanalooli.

* **7:7** 7:7 Bala kalata gwa Ukusooka 20:17; Ukukumbuka Ingomeelesyo 5:21.

13 Bule, akandu akanunu ako kaalindwaliile ubufwe? Himma na panandi! Ubutulanongwa bo ubu bwalindwaliile ubufwe ukwendela ku ndagilo sila inunu, ukuti buboneke ukuya bo butulanongwa. Ku njila jaa ndagilo, ubutulanongwa bwasisimikisiigwe ukuya butulanongwa nalooli.

Jesu ikubapoka abandu ukufuma mbulagili ubwa butulanongwa

14 Tumeenye ukuti indagilo sya Moose syafumile kwa Kyala, looli une ndi mundu itolo, une nuulisiigwe ukuya ntumwa gwa butulanongwa.†
 15 Isi ngubomba nalooli une ndikwibona. Niiganile ukubomba inunu, leelo ndikubomba. Looli isi ngasigana syo isi ngubomba. 16 Paapo une ngubomba isi ngasigana, po sikunangisya ukuti ngwitika, ukuti indagilo nunu. 17 Po ndikuya jo une ne ngubomba isi ngasigana, looli butulanongwa ubu buli nkati mmyangu.
 18 Mmeenye ukuti nkati mmyangu, kokuti mbundu bwangu ubwa butulanongwa, kakajamo akandu akanunu kokoosa. Namanga niiganile ukubomba inunu, leelo ndikubomba.
 19 Po ndikubomba inunu isi niiganile, looli ngubomba imbiibi isi ngiigana ukusibomba.
 20 Paapo une ngubomba isi ngasigana, po sikunangisya ukuti ndikuya jo une ne ngubomba isyo, looli bukuya butulanongwa ubu bulimo nkati mmyangu.

† 7:14 7:14 Untumwa gwa butulanongwa Bala iisya Untumwa ku Isyakulingaania.

21 Po leelo nkabwene akandu aka: Bo ngulonda ukubomba akandu akanunu, ngukwabigwa ukubomba akandu akabiibi.

22 Indagilo sya Kyala nsiganile ni ndumbula jangu joosa. 23 Looli utambakaasya utwa mbili gwangu tukulongosigwa na maka agaa butulanongwa aga gikupingana ni nyiinogono. Fikumbela ukujja ntumwa gwa kububombela ubutulanongwa ubu bukubomba imbombo mu mbili gwangu.

24 Ahiili une! Jo jwani ugwa kumboka une, nsookemo mbundu ubu bukulongosigwa nu bufwe? 25 Kyala atuufigwege, ujja ikumboka ku njila jaa Ntwa gwitwa Jesu Kilisiti!

Namanga une ndi ntumwa gwa ndagilo sya Kyala mu nyiinogono syangu, looli mbundu bwangu, ndi ntumwa gwa ndagilo isya butulanongwa.

8

Ukulongosigwa na Mbepo Mwikemo

1 Po leelo, akabalilo aka, kukajako ukupeeligwa ulufundo abandu aba balungeene na Kilisiti Jesu. 2 Namanga Mbepo Mwikemo ujja ikubapa ubuumi bwa bwila na bwila, aambiikile ukujja mwabuke mwa Kilisiti Jesu, ukufuma mbutulanongwa na mbufwe.

3 Indagilo sya Moose sikaabagiile ukutupoka, kunongwa jaa boonywa ubwa bundu bwitu ubwa butulanongwa. Looli Kyala atupokile. Aalintumile uMwanaake juujo, ukujja nu mbili bo ugwa bandu, ukuti aje ikemo ilya kbooligwa

ilya kubusoosyapo ubutulanongwa. Ku njila iyi aabulongile ubutulanongwa. ⁴ Kyala aabombile bo alo ukuti ingolofu isi sikulongigwa ni ndagilo sya Moose sibombigwe pakati pamyitu, uswe twe tukulongosigwa na Mbepo gwake, somma ku maka agaa bundu bwitu ubwa butulanongwa.

⁵ Namanga aba bikulongosigwa nu bundu bwabo ubwa butulanongwa, inyiinogono syabo sikulonda ukutula inongwa. Looli aba bikulongosigwa na Mbepo Mwikemo, inyiinogono syabo sikulonda isi sikunkyela Mbepo ujo. ⁶ Umundu uju ikulongosigwa nu bundu bwake ubwa butulanongwa, ummaliikisyo gwake bo bufwe bwene. Looli uju ikulongosigwa na Mbepo Mwikemo, ikukaba ubuuni nu lutengaano. ⁷ Po uju ikulongosigwa nu bundu ubwa butulanongwa, umwene jo ndugu gwa Kyala. Umundu ujo atikusitiila indagilo isya Kyala, akabagila ukusitiila. ⁸ Uju ikulongosigwa nu bundu ubwa butulanongwa akabagila ukunkyela Kyala.

⁹ Looli umwe mutikulongosigwa nu bundu ubwa butulanongwa, looli mukulongosigwa na Mbepo gwa Kyala, linga Mbepo ujo ikutugala nkati mmyinu. Looli umundu gwesa uju akaja na Mbepo ujo, uju jo Mbepo gwa Kilisiti, umundu ujo akaja gwake. ¹⁰ Linga Kilisiti ikutugala nkati mmyinu, Kyala ababalile ubugolofu, na Mbepo Mwikemo ikubapa ubuuni bwa bwila na bwila, na paapo imibili gyinu gifwile kunongwa jaa butulanongwa. ¹¹ Kangi linga Mbepo gwa Kyala, uju aalinsyusiisye Jesu, ikutugala nkati

mmyinu, po Kyala ujũ aalinsyusiisye Kilisiti ukufuma mbafwe ikwisa kugipa imibili gyinu ubũami, ku njila jaa Mbepo gwake ujũ ali nkati mmyinu.

¹² Baamyitu ndwitiko, uswe tutikulondigwa ukutuugala mbũami ubũ bukulongosigwa nu bũndũ bwitu ubwa butulanongwa.

¹³ Namanga linga mukutuugala mbũami ubũ bukulongosigwa nu bũndũ ubwa butulanongwa, mukwisa kufwa. Looli linga ku maka agaa Mbepo Mwikemo, mukusigoga imbombo imbiibi, aamukujaga bũami bwila na bwila.

¹⁴ Boosa aba bikulongosigwa na Mbepo gwa Kyala bo baana baa Kyala. ¹⁵ Namanga Mbepo ujũ mwapeeliigwe, akaabapelile kangi ukũja batũmwa aba bali nu lutende.

Looli abapelile umwe ukũja baana baa Kyala, na kulĩ ujo tukũkoolela Kyala ukuti, "Abba," kokuti, "Taata."

¹⁶ Mbepo Mwikemo juũjo ikusisimikisya mu ndumbula syitu ukuti, uswe tuli baana baa Kyala. ¹⁷ Po linga uswe tuli baana baa Kyala, tuli baa kilingo ikya Kyala.

Nalooli tukwisa kwingilapo ikilingo pamopeene na Kilisiti, linga uswe tuli baliilanisi mu ngũbilo syake, ukuti tũje baliilanisi moope na mbũsisya bwake.

Kyala ikwisa kubapa ubũsisya abaanaake

¹⁸ Ingũbilo isya kabalilo aka ngũsibona ukuti kandũ kaa itolo, ukufwanikisya nu bũsisya ubũ Kyala ikwisa kutusetulila. ¹⁹ Ifipeligwa fyosa fikũguulila ndũsũũbilo akabalilo aka Kyala ikwisa kubasetula pabwelu abaanaake ukuti bo

baani. ²⁰ Namanga ifipeligwa fyosa fyalyand-wike filinkuja fya mwalo, somma ku bwigane bwabo, looli ku bwigane bwa Kyala juuho. Po fikugulila ndusubilo, ²¹ ukuti fiise kubikigwa mbwabuke ukufuma mbutumwa bwabo ubwa loonangiko, ukuti fije na bwabuke ubukulumba bwa baana baa Kyala.

²² Tumeenye ukuti ukufika akabalilo aka, ifipeligwa fyosa fikulila ku lubabo bo ulwa nkiikulu uju ali pakupaapa. ²³ Na nuuswe, twe tpeeliigwe Mbepo Mwikemo, tukulila fiijo mu ndumbula syitu kuno tukungulila Kyala ukuti atupele ukuja baanaake, kokuti ikwisa kutwabula na kutupa imibili imipya.

²⁴ Hlusubilo ulo tuli nalo ukwandila apa Kyala aatupokile. Looli linga tukabwene aka tukukasubila, kukajako ukugulila. Bule, jo jwani uju ikusubila ukupeeligwa akandu aka ali nako? ²⁵ Looli linga tukusubila ukupeeligwa akandu aka tutikukabona, po tukumiilila ukugulila.

²⁶ Bububo Mbepo Mwikemo ikututuula mboonywa bwitu. Namanga tukamanya ukwipuuta bo muno Kyala ikulondela, looli Mbepo juuho ikutwipuutira ni kitima iki ukabagila ukukilingania. ²⁷ Kyala uju asimeenye isi silimo mu ndumbula sya bandu, asimeenye syope ni nyinogono isya Mbepo gwake. Namanga Mbepo ujo ikubiipuutira abitiki ukukongana na bwigane bwa Kyala.

²⁸ Tumeenye ukuti, kuli syosa Kyala ikubabombela inunu abandu aba bannganile, aba ababilikiile ukukongana ni nyango jaake.

29 Namanga Kyala aatalile ukubamanya abasunguligwa baake bo akaali ukukipela ikiisu. Aabasungwile ukuti bajege bo muno uMwanaake ajiliile, ukuti ujo ajege nkulumba pakati pa baana boosa abaa Kyala. 30 Po leelo aba abasungwile, bo aba aababilikiile. Aba aababilikiile, bo aba aababalile ubugolofu. Kangi aba aababalile ubugolofu, bo aba aabapeele ubusisya bwake.

Akajako ugwa kutupaagula ndugano lwa Kyala

31 Liilino tuti fiki ku nongwa isyo? Linga Kyala ali pamopeene na nuuswe, bule, jo jwani aikututola? 32 Kyala akaalimpaakiisye uMwanaake ukufundigwa, looli aalinsoosiisye ukuti atufwile uswe twesa. Linga aatupeele uMwanaake ukutufwila uswe, nalooli ikwisa kutupa utunda toosa. 33 Bule, jo jwani ujū aikumela ukuti abasunguligwa baa Kyala balongigwe? Akajako najūmo, namanga Kyala juūjo jo ujū ababalile ubugolofu. 34 Bule, jo jwani ujū aikubasitaaka abasunguligwa baa Kyala? Akajako najūmo, namanga jo Kilisiti Jesu, ujū aafwile nu kusyuka, atugeele kukibafu ikiiliilo ikya Kyala pabūjo ubwimikigwa fiijo, uko ikutwipuutila uswe.

35 Fyo filiku ifi fibagiile ukutupaagula ndugano ulwa Kilisiti? Bule, ubatolwe, pamo ubukamandanigwa, pamo ingabilo, pamo injala, pamo ukusita kuja ni myenda, pamo ukufwimigwa, pamo ukugogigwa? 36 Bo muno sisimbiigwe mwa Kalata uMwikemo ukuti,

“Amasikũ goosa tukufwimigwa,
 paapo tukukubombela ugwe.
 Uſwe tukubombeligwa kabiibi,
 bo ulwa ng’oosi isya kũbooligwa.”*

³⁷ Looli kulĩ syosa isi uſwe tukutola fiijo,
 ukwendela mwa Kilisiti ujũ atuganile.

³⁸ Namanga nsyageenie nalooli ukuti kakajako
 akandũ aka kabagiile ukutupaagula ndugano
 lwa Kyala. Linga tuli buumi, pamo linga tufwile,
 aatutikupaaguligwa. Akajako ugwandumi, pamo
 undagili gwa nkiisu muno, pamo utundu utũ
 tukubombigwa akabalilo aka, pamo utũ tukwisa
 piitaasi, ³⁹ pamo utundu utwa kumwanya, pamo
 utundu utwa ku busyuka, pamo ikipeligwa ikingi
 kyokyosa iki kibagiile ukutupaagula ndugano
 lwa Kyala, ulũ alusetwile ukwendela mwa Kilisiti
 Jesu, uNtwa gwitũ.

9

*Kyala aabasungwile aBanyaisilaili ukũja
 bandũ baake*

¹ Kilisiti nkeeti gwangu ukuti ngũjoba isya
 nalooli, indumbula jangu jikũũsisimikisya
 jikulongosigwa na Mbepo Mwikemo ukuti
 ndikutungulapa. ² Nsulumeenie fiijo nũ

kubabigwa ukũsita kũmalika mu ndumbula.

³ Naabagiile ukũhoboka ukũgunigwa na Kyala
 nũ kũsoosigwamo mwa Kilisiti ukuti abandũ
 abaa nkikolo kyangũ bapokigwe! ⁴ Abo bo

Banyaisilaili. Bo aba Kyala aababiikile ukũja
 baanaake. Aali pamopeene nabo mbũsisya

* **8:36** 8:36 Bala kalata gwa Isabũli 44:22.

bwake. Bo aba Kyala aabiikile ulwitikano nabo, nu kubapa indagilo syake, nu kufinga kumyabo, nu kubalagila muno bikulondeligwa ukummwipuuta. ⁵ ABanyaisilaili abo, baa ndujungu lwa Abulahamu, Isaka na Jaakobo. Joope Kilisiti afumile ndujungu lwabo. Jo Kyala, uNkulumba gwa fyosa. Atuufigwege bwila na bwila! Amen.

⁶ Bale, Kyala aatoliigwe ukubomba isi aafingile ku Banyaisilaili? Himma! Paapo abaa ndujungu lwa Abulahamu bamo bakaja basunguligwa baa Kyala. ⁷ Kangi abaa ndujungu lwa Abulahamu bamo batikubaligwa ukuja baanaake, paapo Kyala aalimmbuulile Abulahamu aatile, "Uujungu lwako lukufuma kwa Isaka."* ⁸ Kokuti, abaana bamo aba aabapaapile Abulahamu bakaja baana baa Kyala. Looli aba bapaapiigwe ukukongana na muno Kyala aafingiile kwa Abulahamu, bo aba bikubaligwa ukuja baana baa Kyala. ⁹ Namanga ulufingo ulwene lukuti, "Angugomokelako nkabalilo aka nkabaatiike, Sala aikujaga nu mwana unnyambala."†

¹⁰ Kangi sikaja syo isyo itolo. Umwana ujo jo Isaka, unkasi gwake Lebeke aalimpaapiile abaana babili abiipasya. ¹¹⁻¹² Bo bakaali ukupaapigwa abiipasya abo, Kyala alinkummbuula Lebeke ukuti, "Unkulumba ikwisa kummbombelaga unnandi."‡ Kyala bo ikujoba isyo, abaana abo bo bakaali ukubomba

* **9:7** 9:7 Bala kalata gwa Ubwandilo 21:12. † **9:9** 9:9 Bala kalata gwa Ubwandilo 18:10, 14. ‡ **9:11-12** 9:11-12 Bala kalata gwa Ubwandilo 25:23.

nasimo inunu pamo imbiibi. Isi sikunangisya ukuti Kyala ikusungula abandu ukukongana nū bwigane bwake. Batikusunguligwa ukukongana ni mbombo syabo, looli bikusunguligwa na ujū ikubabilikila. ¹³ Jo nongwa iji Kalata uMwikemo ikuti, “Jaakobo naalinnganile, looli Esabu naalinkaanile.”§

Kyala ngolofu

¹⁴ Po tuti fiki? Bale, tutigi Kyala akaabombile isya bwanalooli? Himma na panandi!

¹⁵ Namanga aalimmbūlile Moose aatile,

“Une ndi nū lupakisyo

kū mundu ujū niiganile ukumpaakisyā,
kangi ngumpelela ikisa

umundu ujū niiganile ukumpelela ikisa.”*

¹⁶ Akapala kyo kisa ikya Kyala, bukaja bwigane bwa bandu, pamo ukwijūla kwabo abeene.

¹⁷ Kangi mwa Kalata uMwikemo aalimmbūlile Falao aatile, “Naakubiikile ukujā malafyale ukuti kū njila jaako mbanangisye abandu amaka gangū, nū kuti ingamu jangu jifumusigwege ikiisu kyosa.”† ¹⁸ Po leelo tumeenye ukuti Kyala ukumpaakisyā umundu gwesa ujū abaatiike ukumpaakisyā, nū kumpelela ubukafu indumbula ujū abaatiike ukumpelela ubukafu.

Ingalalisi ni kisa kya Kyala

¹⁹ Pamo ubagiile ukuundaalusya ukuti, “Linga sili bo ulo, fiki Kyala ikutulonga? Namanga akajako umundu ujū abagiile

§ **9:13** 9:13 Bala kalata gwa Malaki 1:2-3. * **9:15** 9:15 Bala kalata gwa Ukusooka 33:19. † **9:17** 9:17 Bala kalata gwa Ukusooka 9:16.

ukusisigila imbaatiko sya Kyala.” ²⁰ Ugwe uli mundu itolo! Bule, ubagiile buleebule ukutolana na Kyala? Bule, ikipeligwa kibagiile ukutolana na uju aakipelile nu kulaalusya ukuti, “Fiki umbelile bo ulu?” † ²¹ Bule, umbumba ndeko atikubumba muno iganiile? Indeko jimo ikujibumba ku mbombo ijaa kwimikigwa, ijingi ku mbombo isita kwimikigwa.

²² Bo sili kwa Kyala. Aalondaga ukubanangisya abandū ingalalisi syake na maka gaake, looli abakeeteliile fijo aba baalondigwaga ukulongigwa nu kupyutigwa. ²³ Kangi aalondaga ukubusetula ubusisya bwake ubukulumba, kuli aba aalondaga ukubapelela ikisa, aba aabatendekiisye kilingaani ukubarapo ubusisya bwake. ²⁴ Abandū abo, bo aba aabasungwile, kokuti uswe twesa twe Bajuuta na aba bakaja Bajuuta. ²⁵ Isi syo isi Kyala aajobile mwa kalata ugwa nkunguluka Osija ukuti,

“Aba bakaja bandu bangu,
ngubatigi, ‘Bandu bangu.’
Abandū aba ngaabaganile,
ngubatigi, ‘Bakundwe bangu.’ ” §

²⁶ Kangi,
“Pabujō ubu baajobigwaga ukuti,
‘Umwe mukaja bandu bangu,’
po apa aabikujobigwaga ukuti,
‘Baana baa Kyala uMuumi.’ ” *

²⁷ Joope unkunguluka Jeesa ja ikujoba sisiisyo ku Banyaisilaili ikuti,

† **9:20** 9:20 Bala kalata gwa Jeesa ja 29:16. § **9:25** 9:25 Bala kalata gwa Osija 2:23. * **9:26** 9:26 Bala kalata gwa Osija 1:10.

“Nalinga aBanyaisilaili bingi bo ulwa nsanga
 ugwa kumbali ku nyanja,
 poope abandũ aba aabikupokigwa banandi.
 28 Namanga uNtwa Kyala ikwisa kubapa
 ulufundo ulusita kwagilwa
 abandũ abaa pakiiŝu apa, kisita kukaabila.”†
 29 Bo muno aajobiile ijolo unkunguluka Jeŝaja
 ukuti,
 “Linga uNtwa uMwene maka goosa akaasyesye
 bamo abaa ndujungu lwiŝu,
 ngali tũpyutiigwe loosa bo ulwa bandũ abaa mu
 Sotoma na Gomola.”‡

*Isi syabapelile aBanyaisilaili bamo ukusita
 kubaligwa ubugolofu*

30 Bule, tuti fiki? Na paapo abandũ aba
 bakaja Banyaisilaili bakaaliijũulile ukuti ba-
 baligwe ubugolofu na Kyala, poope Kyala aaba-
 balile ubugolofu ku nongwa jaa lwiŝiko lwabo.
 31 Kangi kokuti, aBanyaisilaili aba biijuulaga
 ukusikonga indagilo ukuti babaligwe ubugolofu,
 baatoliigwe ukusikonga indagilo sila. 32 Fiki
 bakaabaliigwe ubugolofu? Paapo biijuulaga
 ukusikonga imbombo sya ndagilo, kisita lwiŝiko
 kwa Kyala. Balinkwitika pi ibweŝ lila iikulumba,
 balinkugwa. 33 Bo muno sisimbiigwe mwa
 Kalata uMwikemo ukuti,
 “Namukeete, uko nkaaja akaa mu Syoni,*
 mbiikile iliibwe ili abandũ aabikwitikan-
 gapo,

† 9:28 9:27-28 Bala kalata gwa Jeŝaja 10:22-23. ‡ 9:29 9:29
 Bala kalata gwa Jeŝaja 1:9; Ubwandilo 19:24-25. § 9:32 9:32
 Iibwe Kokuti Kilisiti. * 9:33 9:33 Syoni ngamu ijingi ijaa
 Jelusalemu.

ili aalikubapelelaga abandu ukugwa.
 Looli umundu gwesa uju ikummwitika uju jo
 ibwe ilyo,
 atikwisa kusukamo siku!"†

10

¹ Baamyitu ndwitiko, ngunyonywa mu ndumbula jangu ukuti abiinangu abo abanyaisilaili bapokigwe. Isyo syo isi ngusuma ukuti Kyala asibombe. ² Nikubabwala umwe, abandu abo bikwijwala ukunkonga Kyala, looli bakamanya muno Kyala ikulondela ukunkonga. ³ Abeene bakaabwageenie ubugolofu bwa Kyala, bakaaliibikile paasi pa bugolofu bwake. Looli biilondelaga ubugolofu bwabo abeene. ⁴ Namanga Kilisiti jo bumalikilo bwa ndagilo, ukuti abandu boosa aba ikummwitika babaligwe ubugolofu.

Abandu boosa babagiile ukupokigwa

⁵ Ukubaligwa ubugolofu ku njila jaa kusikonga indagilo, Moose aasimbile aatile, "Umundu gwesa uju ikusikonga indagilo syosa, ikujaga nu bwami ku njila jaa kusikonga."* ⁶ Looli ukubaligwa ubugolofu ku njila ijaa lwitiko, Kalata uMwikemo ikuti, "Mulingiilaalusyaga mu ndumbula syinu ukuti, 'Jo jwani abagiile ukufyuka kumwanya?' " Kokuti ukuntwala Kilisiti pakiisu. ⁷ "Pamo ukuti, 'Jo jwani ugwa kusuluka mpaka ku busyuka?' " Kokuti

† 9:33 9:33 Bala kalata gwa Jejesaja 8:14; 28:16.
 Bala kalata gwa Abanyaleebi 18:5.

* 10:5 10:5

ukunsyusya Kilisiti ukufuma mbafwe.† 8 Looli Kalata uMwikemo ikuti fiki? Ikuti, “Iisyu lya Kyala lili kifuki na nungwe, lili nkanwa mmyako na mu ndumbula jaako.”‡ Kokuti jo ndami jaa kummwitika Kilisiti, iji tukufumusya.

9 Po linga kujoba na kanwa kaako ukuti, “Jesu jo Ntwa,” na kwitika mu ndumbula jaako ukuti Kyala aalinsyusiisye ukufuma mbafwe, kupokigwa. 10 Namanga mu ndumbula umundu ikwitika, po ikubaligwa ubugolofu, kangi na kanwa kaake ikujoba, po ikupokigwa.

11 Kalata uMwikemo ikuti, “Umundu gwesa uju ikummwitika atikwisa kusukamo siku.”§

12 Namanga bakaleganapo uNjuuta na uju akaja Njuuta. U Ntwa ali jumojuwene, jo Ntwa gwa bandu boosa, ikubasaja boosa aba bikunsuuma.

13 Bo muno sisimbiigwe mwa Kalata uMwikemo ukuti, “Kukuti mundu uju ikusumila mu ngamu jaa Ntwa, ikupokigwa.”*

14 Po abandu babagiile buleebule ukunsuuma, linga bakammwitika? Kangi babagiile ukummwitika buleebule, linga bakapilikamo indumi jaake? Babagiile ukupilika buleebule, linga bakalumbililigwa? 15 Kangi babagiile buleebule ukulumbililigwa, linga abandu bakatumigwa kukubalumbilila? Fyobeene Kalata uMwikemo ikuti, “Kununu fiijo ukwisa kwa bandu aba bikulumbilila indumi inunu!”†

† 10:7 10:6-7 Bala kalata gwa Ukukumbuka Ingomeelesyo 30:12-13. ‡ 10:8 10:8 Bala kalata gwa Ukukumbuka

Ingomeelesyo 30:14. § 10:11 10:11 Bala kalata gwa Jeasaja

28:16. * 10:13 10:13 Bala kalata gwa Joeli 2:32. † 10:15 10:15

Bala kalata gwa Jeasaja 52:7.

16 Leelo aBanyaisilaili bamo bakaaliitiike iNdumi iNunu ijaa Jesu. Namanga unkunguluka Jeeseja aajobile aatile, “Gwe Ntwa, jo jwani iitiike indumi jitu?”‡ 17 Po leelo abandũ ukuti biitike, mpaka bapilike indumi ijo. Po ukuti bapilike, mpaka balumbililigwe iNdumi jaa Kilisiti.

18 Leelo ngwilaalusya, bũle aBanyaisilaili bakapilikamo? Nalooli baapiliike, namanga Kalata uMwikemo ikuti,
 “Indumi jibalaniile pakiisu kyosa,
 amasyu gaabo gaabalaniile ukufika
 kummaliikisyo ugwa kiisu.”§

19 Kangi ngwilaalusya, bũle aBanyaisilaili bakaasyageenie? Baasyageenie paapo Kyala aababũlile ukwendela kwa Moose aatile,
 “Ngubapela ukujja nu bũfi,
 ku bandũ aba bakaja bandũ bangũ,
 ngubakalasya fiijo umwe,
 ku bandũ aba bakamanya.”*

20 Kangi unkunguluka Jeeseja ikujoba ku bukifu ikuti,
 “Abandũ aba bakaandondaga,
 bo aba baambwene.
 Abandũ aba batikulaalusya inongwa syangu,
 niisetwile kumyabo.”†

21 Looli isya Banyaisilaili, Kyala ikuti,
 “Umuusi goosa naabagolokiisye amaboko gangũ,
 abandũ aba batikũnyimika,

‡ **10:16** 10:16 Bala kalata gwa Jeeseja 53:1. § **10:18** 10:18 Bala kalata gwa Isabũli 19:4. * **10:19** 10:19 Bala kalata gwa Ukukũmbuka Ingomeesyo 32:21. † **10:20** 10:20 Bala kalata gwa Jeeseja 65:1.

kangi baa lukaani.”‡

11

Kyala akabaleka abandũ baake aBanyaisilaili

¹ Po leelo ngubalaalusya nguti, bũle, Kyala abalekile abandũ baake? Himma na panandi! Ũne niine ndi Mwisilaili, ugwa ndũjungu ulwa Abulahamu, nkikolo ikya Benjamini. ² Kyala akabaleka abandũ baake,* aba aabasungwile ijolo. Bũle, mukasimanya isi sisimbiigwe mwa Kalata uMwikemo isi sikunjoba Elija, muno aasũmiile kwa Kyala kunongwa jaa Banyaisilaili? ³ Aatile, “Gwe Kyala, abandũ aba, baabagogile abakunguluka baako nu koonanga ifigemo fyako. Nsyele niimwene, kangi bikulonda ukũngoga niine!”† ⁴ Kyala aalimmwamwile bũleebũle? Aatile, “Niibiikiile abandũ 7,000 mu Isilaili aba batikũmmwipuuta Baali.”‡

⁵ Na ulũ bo sili akabalilo aka. Balipo banandi aba basyele aba Kyala abasungwile kwi ipyana lyake. ⁶ Po leelo, linga tusunguliigwe kwi ipyana lya Kyala, tutikupokigwa ni mbombo isi tukubomba. Linga Kyala aabapokaga abandũ kunongwa jaa mbombo syabo, po ngali iipyana likaja ipyana kangi.

⁷ Po leelo sili bũleebũle ulũ? ABanyaisilaili baalondaga ukũja bagolofu, looli bakaakabile. Beene aba Kyala aabasungwile, bo aba

‡ **10:21** 10:21 Bala kalata gwa Jeesaia 65:2. * **11:2** 11:2 Bala kalata gwa 1 Samweli 12:22. † **11:3** 11:3 Bala kalata gwa 1 Abanyafyale 19:10, 14. ‡ **11:4** 11:4 Bala kalata gwa 1 Abanyafyale 19:18.

baakabile. Looli aBanyaisilaili abangi boosa, aabapelile ukujja ni ndumbula ingafu, ⁸ bo muno sisimbiigwe mwa Kalata uMwikemo ukuti, “Kyala aabaluuuleesye bo ulwa bandu aba bagonile utulo,

aabapelile ukuti balingakeetaga, aasindiile imbulukutu ukuti balingapilikaga, bali bo ulu mpaka umwisyugu.”[§]

⁹ Joope umalafyale Ndaabiti aatile, “Bo bali pa findu fyabo ifya pa lusekelo, Kyala afisanusye ukujja ntego, untego ugwa kubakola abeene, ukwikinyamo nu kubafunda.

¹⁰ Amaaso gaabo gabiikigwe ingiisi, ukuti balingafibonaga nafimo, inyuma syabo sigundamege bwila, ku ngubilo syabo.”*

¹¹ Po ngwilaaluuusya kangu, bule, aBanyaisilaili bo biikinyilemo, baagwile loosa? Himma na panandi! Abeene bo bankaaniile Kyala, Kyala aabapeele abanduu abaa mfikolo ifingi injila ijaa kupokigwa. Aabombile bo ulu ukuti aBanyaisilaili bababonelege ubuufi abo.

¹² Ukwikinyamo ukwa Banyaisilaili kwatwele iipyana ilingi ku bandu boosa abaa pakiisu, kangu ukugwa kwa Banyaisilaili kwatwele iipyana ilingi ku bandu abaa mfikolo ifingi. Po abanduu boosa aabikukabamo iipyana ukukindapo, aBanyaisilaili bo bammwitiike kangu uMpoki.

§ **11:8** 11:8 Bala kalata gwa Ukukumbuka Ingomeelesyo 29:4; Jeosaja 29:10. * **11:10** 11:9-10 Bala kalata gwa Isabuli 69:22-23.

Isajo ku bandu aba bakaja Banyaisilaili

¹³ Ulu ngujoba na nuumwe mwe mukaja Banyaisilaili. Paapo Kyala aalindumile ukaja ntumigwa gwinu,[†] ngwituukifya imbombo ijo. ¹⁴ Ngusubila ukuti, pamo aBanyaisilaili biinangu bikubabonelaga ubuufi umwe kuli isi Kyala ikubabombela, ukuti bamo pakati pamyabo bapokigwe. ¹⁵ Namanga Kyala bo abakaanile aBanyaisilaili, alinkumanyana nabo abandū abaa mfikolo ifingi. Linga Kyala ikumanyana na Banyaisilaili kangi, bukujaga buumi kuli aba baafwile! ¹⁶ Linga umundu ansookiisye Kyala iflubukilwa ukaja ikemo, fyosa ifi atondwile fikaja fiikemo. Kangi linga imisi igya nsyunguti miikemo, ni samba syake syope sikuja nyiikemo.

¹⁷ Umwe mwe mukaja Banyaisilaili, muli bo isamba isya nsyunguti ugwa mmatengele. ABanyaisilaili bali bo isamba isya nsyunguti ugwa mu ngunda. ABanyaisilaili bamo batumuliigwe ukufuma mu mpiki ugwa mu ngunda, umwe mulungisiigwe pabujo bwabo, mukumela nu kukaba ifinunu ukufuma mu nsi gwa nsyunguti ugu gubyaligwe. ¹⁸ Po leelo mulingasiilaamwaga isamba isi situmuliigwe. Muleke ukwituufya. Mumanyege ukuti imisi gitikubasubila umwe, looli umwe jo umwe mukugisubila imisi. ¹⁹ Lumo kuti, “Isamba isyo syatumuliigwe ukuti une ningile pabujo bwabo.” ²⁰ Isyo sya nalooli. Isamba isyo syatumuliigwe kunongwa jaa kusita kwitika, looli ugwe gwimile

[†] **11:13** 11:13 Untumigwa gwinu Bala iisya Abatumigwa ku Isyakalingaania.

kanunu kunongwa jaa lwitiko lwako. Po leelo gwitiimege, ulingiituufyaga. ²¹ Linga Kyala aasitumwile isamba isya kubwandilo, abagiile ukubomba bo ulo na kumyako.

²² Ukeete muno Kyala ajiliile ubununu, kangi nkali. Aababombiile ubukali aba baalinkaanile, looli ikukubombela kanunu ugwe, linga kwendelela ukunsuubila. Looli linga kunndeka, po nungwe kutumuligwa. ²³ Boope aBanyaisilaili bala linga bikummwitika kangi Kyala, bikulungisigwa kangi mu nsyunguti, paapo Kyala ali na maka agaa kubalungisya kangi. ²⁴ Po leelo ugwe gwe ukaja Mwisilaili gwatumuliigwe ukufuma mu nsyunguti ugwa mmatengele, nu kulungisigwa mu nsyunguti ugwa mu ngunda. Ako kandu kapyo ukubombigwa.‡ Umanyeye ukuti jikaja mbombo ngafu kwa Kyala ukubagomokesyapo aBanyaisilaili pabujo bwabo!

Kyala ali nu lupakisyo ku bandu boosa

²⁵ Baamyitu ndwitiko, ngulonda mumanye ulabaatikulo ulwa mbutiitu ulwa Kyala, ukuti mulingiisa kwituufya. ABanyaisilaili bamo bakafu indumbula, bikwendelela ukaja bakafu kukabalilo, mpaka jifwane imbalilo ijaa bandu baa mfiisu ifingi abaa kwambililigwa na Kyala. ²⁶ Ku njila ijo, aBanyaisilaili boosa bikwisa

‡ **11:24** 11:24 Abandu bikatumula isamba isya mpiki ugu gubyaligwe nu kusilanga mu mpiki ugwa ndiisu. Looli akandu akapya apa, po apa Pauli ikuti isamba isya ndiisu sikulungigwa mu mpiki ugu gubyaligwe.

kupokigwa. Bo muno sisimbiigwe mwa Kalata
umWikemo ukuti,

“UmPoki ikwisa kufuma nkaaja akaa mu Syoni,
ikwisa kulupela ulujungu lwa Jaakobo
ukusita kunkaana Kyala.

²⁷ Ulo lwitikano lwangu ulu ngwisa kubika,
po ngwisa kusoosyapo ubutulanongwa
bwabo.”§

²⁸ Kunongwa jaa kukaana iNdumi iNunu,
aBanyaisilaili baaliipelile balugu baa Kyala,
ukukabamo umwe mwe bandu abaa mfikolo
ifingi. Looli Kyala akaali abaganile, paapo
aabasungwile abiisukululu baabo ku bwigane
bwake. ²⁹ Namanga linga Kyala abasungwile
abandu nu kubasaja, akabagila ukwandula.

³⁰ Kubwandilo umwe mukantiilaga Kyala,
looli akabalilo aka ukusita kutiila ukwa
Banyaisilaili kupelile ukupaakisigwa umwe.

³¹ Bo lululo, ukupaakisigwa kwinu, kukwisa
kupela ukupaakisigwa abeene, na paapo
batikantiila Kyala akabalilo aka. ³² Po leelo Kyala
abapinyile abandu boosa pakiisu ku bukafu bwa
ndumbula syabo, ukuti abapaakisye abandu
boosa.

Kyala atuufigwege

³³ Keeta, bo bwingi buki ubukabi ubwa Kyala,
amahala nu bumanyi bwake ubukulumba? Jo
jwani abagiile ukubwagania ubulongi, ni njila
sya Kyala?

³⁴ “Jwani asyageenie inyiinogono sya Ntwa
Kyala,

§ **11:27** 11:26-27 Bala kalata gwa Jeesaaja 27:9; 59:20-21; Jelemija
31:33-34.

- pamo jwani abagiile ukunndingaania?”*
- 35 “Jwani ankopiisyemo akandu Kyala,
akaa kuti mpaka Kyala ahombe?”†
- 36 Namanga fyosa fikufuma kumyake,
fyosa fyapeliigwe nagwe,
fyosa filipo ukunangisya ubusisya bwake.
Kyala atuufigwege bwila na bwila! Ameni.

12

Ukumbombela Kyala

1 Po baamyitu ndwitiko, nikubapyelesya ku kibabiilisi ikya Kyala, mwiningege ukuja ikemo ilyumi, iliikemo ili likunkyela Kyala. Namanga ijo jo njila inunu ijaa kummwipuuta Kyala. 2 Mulingakongaga akajilo ni nyiiho isya bandu abaa pakiisu apa, looli Kyala abasanusye mu ndumbula syinu ukuti muje ni nyiinogono imbya. Apo po aamukumanya ku bwanalooli inunu isi Kyala ikulonda, isi sikaagilwa na isi sikunkyela.

3 Paapo Kyala ambeele iipyana ukuja ntumigwa gwake, nikubabwela umwe mwesa nikuti, muleke ukwibona ukuti mubagiisye ukukinda muno mujiliile. Looli mwinogonege ku mahala ukuti mwesa mupeeliigwe ulwitiko lulalula na Kyala. 4 Umbili guli gumogwene, leelo guli na tumbakaasya twingi. Kukuti kambakaasya kali ni mbombo jaake. 5 Bubuubo bo muno gujiliile umbili gwa Kilisiti. Uwe twesa tuli mbili gwake gumogwene. Kukuti

* 11:34 11:34 Bala kalata gwa Jeosaja 40:13. † 11:35 11:35 Bala kalata gwa Jobu 41:11.

mundu kambakaasya kamo akaa ntumbakaasya twingi utwa mbili gamogwene ugo.

⁶ Po leelo, Kyala kwi ipyana lyake, ampeele kukuti mundu ikikungilwa ikya lako lwake. Ugwa kikungilwa ikya bukunguluka, akibombelege ukukongana nu lwitiko lwake. ⁷ Ugwa kikungilwa ikya bubombeli, ababombelege ni ndumbula joosa. Ugwa kikungilwa ikya bumanyisi, amanyisyege kanunu. ⁸ Ugwa kikungilwa ikya kubakasya abandu, abakasyege. Ugwa kikungilwa ikya kubatwala abandu ifi baagiilwe, abapege ni ndumbula joosa. Ugwa kikungilwa ikya bulongosi, iijwulege ukulongosya kanunu. Ugwa kikungilwa ikya kupaakisyanya, apaakisyeya nu lusekelo.

Ukuganana nkipanga kya Kyala

⁹ Mugananenge kisita kusyobana. Mububengege loosa ububiibi boosa. Mwitotekege mu nunu akabalilo koosa. ¹⁰ Mugananenge mwesa bo ulwa banyamundu. Kukuti mundu anyonywege fiijo ukummwimika unine. ¹¹ Muleke ukaja boolo, looli mumbombelege uNtwa Jesu bo mukulongosigwa na Mbepo Mwikemo. ¹² Namusekelege paapo mukusubila ukukaba inunu ukufuma kwa Kyala. Muumililege linga ubutolwe bukubiisila, kangi munsuumege Kyala akabalilo koosa. ¹³ Musangulege ifya kubatwala abiitiki biininu. Kangi mujege bengo ukubambilila kanunu abaheesya mu nyumba syinu.

Muno sikulongelwa ukubabombela abangi

14 Mubasajege abandũ aba bikubafunda, mubasajege somma ukubaguna. 15 Musekelege pamopeene nabo aba bikusekela. Mulilege pamopeene na aba bikulila. 16 Mutuugalege kanunu na biiniinu. Mulingiituufyaga, looli mujege nu buliilanisi na bandũ abafujufu, mulingiibonaga ukuti mubakindile amahala.

17 Abandũ linga bikubabombela ububiibi, mulingababombelaga nuumwe ububiibi. Looli musiinogonege fiijo isi sikuboneka ukujja nunu ku bandũ boosa. 18 Mubombege syosa isi mubagiile ukusibomba ukuti mutuugalege nu lutengaano na bandũ boosa. 19 Bakandwe bangũ, mulingabusyaga ububiibi, looli mundekelege Kyala jo abombege isyo. Namanga sisimbiigwe mwa Kalata uMwikemo ukuti, "Untwa Kyala ikuti, 'Ulubukisyo lo lwangũ, nikubukisya jujũne.'"*

20 Isya kusita kubukisya sisimbiigwe mwa Kalata uMwikemo ukuti,

"Linga undũgu gwako ali ni njala, umpege ifindũ,
kangi linga ali ni kyumilwa, umpege ifya kunwa.

Namanga linga kubomba bo ulo,

bo ummbiikiile umooto ugu gukwaka pantu pamyake."†

21 Ulingatoligwaga nu ububiibi, looli ubutolege ububiibi ku njila ijaa kubomba inunu.

* **12:19** 12:19 Bala kalata gwa Ukukumbuka Ingomeelesyo 32:35. † **12:20** 12:20 Bo ummbiikiile umooto ugu gukwaka pantu pamyake Kokuti Bo gunkosiisye isoni. Bala kalata gwa Isya Mbupingamu 25:21-22.

13

Ɖkubiiimika abalongosi

¹ Kukuti mundu ikulondigwa ukubiiimika abalongosi abaa silikali. Namanga ubulongosi boosa bukufuma kwa Kyala, kangi boope boosa babilikiigwe nagwe. ² Po leelo umundu gwesa ujũ ikubupinga ubulongosi bwabo, ikupinga ulubaatiko lwa Kyala. Abandu abo bikwisa kufundigwa. ³ Namanga umundu ujũ ikubomba inunu atikujã nũ lutende kũ ndongosi, looli ujũ ikubomba imbiibi. Bũle, kulonda ukusita kujã nũ lutende kũ balongosi baako? Po bombaga inunu, undongosi ikukutuufyaga. ⁴ Namanga undongosi mbombeli gwa Kyala, imbombo jaake ko kukutuula ugwe. Looli linga ubombile simo imbiibi, po utiilege! Paapo ali na maka agaa kufunda, bukaja bulongosi bwa itolo! Umwene mbombeli gwa Kyala, atumiigwe kukubatwalila ababomba mbiibi ulufundo lwa Kyala. ⁵ Fyobeene abandu bikulondigwa ukwijiisya kũ balongosi, somma kunongwa jaa kutiila lwene ulufundo lwa Kyala, looli kunongwa jaa kuti mumeenye mu ndumbula ukuti kununu ukubomba bo ulo.

⁶ Kangi kunongwa ijo mukusonga isongo. Namanga ababombeli abaa silikali babombeli baa Kyala. Bikwijũula kũ mbombo ijo.

⁷ Namubapege boosa ifi bikulondigwa ukupeeligwa. Linga kulondigwa ukusonga isongo, usongege. Linga umundu jũmo ikulondigwa ukwimikigwa, iimikigwege.

Ɖkuganana

8 Mulingameleligwaga akandũ kokoosa nũ mundũ gwesa, looli mumeleligwege ukuganana umwe. Namanga ujũ ikunngana unne, asibombile indagilo sya Kyala. 9 Keeta indagilo sikuti, “Ulingalogwaga, ulingagogaga, ulingahijaga, kangi ulinganyonywaga akandũ akaa nnino.”* Looli indagilo isyo syosa sili ndulagilo lumolwene itolo ulũ lukuti, “Ubaganene abanino bo ulũ gwijiiganile ugwe.”† 10 Umundũ ujũ ikunngana unne, atikummbombela imbiibi. Ukubagana abandũ abangi ko kusibomba indagilo syosa isya Kyala.

Kuli kifuki ukukya

11 Mukulondigwa ukubomba bo ulo paapo mumeenye ukuti akabalilo akaa kulembuka kafikile. Po akabalilo akaa bupoki bwitu kali kifuki fiijo, ukukinda kubwandilo apa twalyandile ukummwitika unntwa Jesu. 12 Akabalilo aka ikilo kimaliike, kuli kifuki ukukya. Po tusileke imbombo imbiibi isya mu ngiisi, tufwale ifilwilo ifya ndumuli. 13 Tujenge na kajilo akanunu bo ulwa bandũ abaa pamuusi. Tulingajaga bagaala bwalwa, pamo ukumoga imogo isya bulogwe, pamo ukubomba imbombo ingosya soni, pamo ukulwa nũ kuja nũ buufi. 14 Looli mumfwalege unntwa Jesu kilisiti ngati mwenda. Mulingitikaga na panandi ukulongosigwa ni finyonyo fyinu ifibiibi ifya bundũ bwinu ubwa butulanongwa.

* **13:9** 13:9 Bala kalata gwa Ukusooka 20:13-17; Ukukumbuka Ingomeelesyo 5:17-21. † **13:9** 13:9 Bala kalata gwa Abanyaleebi 19:18.

14

Ɛkɔbabombela kanunu aboonywa ndwitiko

¹ Mummwambililege ɔmwitiki mwiniinu ɔmoonywa ndwitiko. Mulingakaanikana nage kɔnongwa jaa nyiinogono syake isi mulegeene nage. ² Ɛmundɔ jɔmo ikwibona ɔkɔti abagiile ɔkɔlyɔ akandɔ kokoosa, looli ɔjɔngi ɔmoonywa ndwitiko, ikɔlyɔ iiseeke ilya maani lyene. ³ Ɛjɔ ikɔlyɔ inyama alingammwilaamwaga ɔjɔ ikɔlyɔ iiseeke ilya maani lyene. Joope ɔjɔ ikɔlyɔ iiseeke ilya maani lyene alinganndongaga ɔjɔ ikɔlyɔ inyama, namanga Kyala abambiliile boosa bobabili. ⁴ Gwe gwani gwe kwibona ɔkɔti ɔbagiisye ɔkɔndonga ɔmbombeli gwa mwinaako? Ɛntwa gwake jɔjɔ jo ikɔtumula ɔkɔti ɔmbombeli gwake asobile pamo akasoba. Na pabɔlongi ɔmundɔ ɔjo ikwisa kɔtola, paapo ɔntwa Jesu ikwisa kɔmpela ɔkɔtola.

⁵ Ɛmundɔ jɔmo ikɔlyimika iisiku limo ɔkɔlikinda iisiku ilingi ɔkɔmmwipuuta Kyala, ɔjɔngi ikwaga goosa gafwene itolo. Kɔkɔti mundɔ asikongege isi ikwaga nunu mu ndumbula jaake. ⁶ Ɛmundɔ ɔjɔ ikɔlyimika fiijo iisiku limo, ikɔbomba bo ɔlo ɔkɔnkɔyela ɔntwa Kyala. Joope ɔjɔ ikɔlyɔ inyama, ikɔbomba bo ɔlo ɔkɔnkɔyela ɔntwa Kyala, namanga ɔmwene ikɔntuufya Kyala kɔ findɔ fyake. Joope ɔjɔ ikɔlyɔ iiseeke ilya maani lyene, ikɔbomba bo ɔlo ɔkɔnkɔyela ɔntwa Kyala, joope ikɔntuufya Kyala.

⁷ Linga uswe tuli buumi, pamo linga tukufwa, sitikuja sya kukabamo uswe twibeene. ⁸ Linga tuli buumi, uNtwa gwitũ Jesu atuufigwege. Linga tukufwa, uNtwa gwitũ Jesu atuufigwege. Linga uswe tuli buumi, pamo linga tukufwa, tuli baa Ntwa Jesu. ⁹ Kilisiti aafwile, kangĩ aasyukile, ukuti aje Ntwa gwa bandũ boosa, abafwe na buumi.

¹⁰ Po fiki bamo pakati pamyĩnu bikũndonga ugwamyabo ndwitiko? Kangĩ fiki bikũmmwilaamwa ugwamyabo? Namanga uswe twesa tukwisa kwĩma nkyeni mwa Kyala ukuti tulongigwe. ¹¹ Bo muno sisimbiigwe mwa Kalata uMwikemo,

“Kyala ikuti,
 ‘Nalooli kukuti mundũ ikwisa kufugama nkyeni mmyangũ,
 nũ kujoba kũ lalimi lwake ukuti une ne Kyala.’ ”*

¹² Po leelo kukuti mundũ pakati pamyitũ, ikwisa kulĩngania juũjo isyake nkyeni mwa Kyala.

Ukutugala pamopeene kũ lutengaano

¹³ Po leelo tuleke ukũbalonga abiitiki biiniitũ. Looli tutumule ukũsita kubomba kokoosa akaa kwikinyamo pamo ukũsobesya. ¹⁴ UNtwa Jesu aanangiisye une pabwelu, kangĩ mbũmeenye ubwanalooli ukuti, fikajapo ifindũ fimo ifi fili mwiko. Looli umundũ linga ikũfibona ifindũ fimo ukũja mwiko, po ifindũ ifyo kũmyake fikujaga mwiko. ¹⁵ Linga ugwe kũntwalila ubusulumanie umwitiki nnino kũ findũ fimo

* **14:11** 14:11 Bala kalata gwa Jeesaia 45:23.

ifi kulya, nalooli ugwe ukaja nu lugano ku mwinaako ujo. Kilisiti aalimfwiliile ujo. Ulingammoonangaga kunongwa jaa findu fyako!
¹⁶ Mupeeliigwe ifinunu, mulingabombaga isya kubapela abangi ukufijoba ububiibi. ¹⁷ Namanga ubunyafyale bwa Kyala kukaja ko kulya nu kunwa, looli ko kubomba isya bugolofu, ukaja nu lutengaano pakati pamyitu, nu kaja nu lusekelo ulu lukufuma kwa Mbepo Mwikemo.
¹⁸ Joope uju ikumbombela Kilisiti bo ulo, ikunkyela Kyala, kangi abandubikummwitikila.
¹⁹ Akabalilo koosa twijualege ukubomba isi sikutwala ulutengaano, na isi sikutuula ukujengana ndwitiko. ²⁰ Ulingoonangaga imbombo jaa Kyala kunongwa jaa findu fyako. Fikajako ifindu ifi fili mwiko, looli kabiibi fiijo ukummwingisya umwinaako mbutulanongwa kunongwa jaa findu ifi kulya.
²¹ Paakipo uleke ukubomba isi umwinaako abagiile ukwikinyamo, kaje ko kulya inyama, pamo ukunwa ifinga,[†] pamo syosyosa sila.
²² Inyiinogono isi uli nasyo ku findu, sijege syako gwimwene nkyeni mwa Kyala. Asajiigwe umundu uju atikwibona ukaja ntulanongwa, bo ikusibomba isi ikusibona ukaja sya bugolofu.
²³ Looli linga kufilaamwa ifindu fimo, poope kulya ifindu ifyo, po uli ntulanongwa, paapo utikubomba ukukongana nu lwitiko lwako mwa Kilisiti. Namanga kukuti kandu aka kubomba, linga katikufuma ndwitiko lwako mwa Kilisiti, ako bo butulanongwa.

[†] **14:21** 14:21 ifinga Bala ku isyakulingaania.

15

Isya kubabombela abangi

¹ Po uswe twe tukakile ndwitiko, tukulondigwa ukubatwala aboonywa ndwitiko. Tulingabombaga syene isi sikutukyela jujuswe.

² Uswe twesa tubabombelege kanunu abiitiki biiniitu, ukuti bakake ndwitiko. ³ Namanga joope na Kilisiti akiikyelaga mwene, looli aasibombaga isi sisimbiigwe mwa Kalata uMwikemo ukuti,

“Amaheelu aga bikukutuka ugwe Kyala, gaaliinyaagile une.”*

⁴ Syosa isi syasimbiigwe ijolo mwa Kalata uMwikemo, syasimbiigwe ukutumanyisya uswe. Amasimbo ago gikutupa uluumiililo nu kutukasya, ukuti tujeye nu lusubilo.

⁵ Kyala uju ikutupa ukuumiilila nu kutukasya abapele ukuya kandu kamokeene, bo mukunkonga Kilisiti Jesu. ⁶ Po umwe mwesa muntuufyege Kyala pamopeene ni ndumbula jimojeene, uGwise gwa Ntwa gwitwa Jesu Kilisiti.

Abiitiki boosa kandu kamokeene

⁷ Po leelo namwambibilanilege bo ulu Kilisiti aabambiliile umwe, ukuti Kyala atuufigwege. ⁸ Namanga nikubabwala umwe nikuti, Kilisiti aaliisile kukubabombela aBajuuta. Aabanangisye ukuti Kyala gwa bwanalooli, nu kuti abombile isi aafingile ku biisukulu baabo. ⁹ Kangi ukuti abandwa aba bakaja Bajuuta

* 15:3 15:3 Bala kalata gwa Isabuli 69:9.

bantuufyege Kyala ku lupaaakisyo lwake, bo muno sisimbiigwe mwa Kalata uMwikemo ukuti, “Po angukwimbila inyimbo isya kukutuufya nkyeni mmbandũ abaa mfikolo ifingi.”†

10 Kangi ikuti,

“Mwe bandũ mwe baa mfikolo ifingi,
namusekelege pamopeene na bandũ baa
Kyala.”‡

11 Kangi ikuti,

“Umwe mwe bandũ baa mfikolo ifingi,
namuntuufyege Kyala.

Umwe mwe bandũ boosa pakiisa,
namunngindikege Kyala!”§

12 Joope unkunguluka Jeesa ja ikuti,

“Umundu jumo ugwa ndujungu ulwa Jese ik-
wisa,
ikwisa kulongosyaga ifikolo ifingi,
abandũ abaa mfikolo ifingi bikwisa
kunsuubilaga.”*

13 Po Kyala ujũ ikutupa ulusuubilo, abapepo ulusekelo loosa nu lutengaano ndwitiko lwinu, ukuti ulusuubilo lwinu longelele ku maka agaa Mbepo Mwikemo.

Inyango ijaa Paũli ukusimba inongwa isi

14 Baamyitu ndwitiko, une mmeenye fi-
ijo ukuti umwe muli bandũ banunu, kangi
mwiswile ubumanyi bwa Kyala, kangi mubagi-
ile ukumanyisania. 15 Leelo inongwa isyo isi

† 15:9 15:9 Bala kalata gwa 2 Samweli 22:50; Isabũli 18:49.

‡ 15:10 15:10 Bala kalata gwa Ukukumbuka Ingomeelesyo 32:43. § 15:11 15:11 Bala kalata gwa Isabũli 117:1. * 15:12

15:12 Bala kalata gwa Jeesa ja 11:10.

mbasimbiile, nsibiikile pabwelu kisita kutiila nkyeni mmyinu. Naalondaga ukubakumbusya syosa, paapo iji jo mbombo iji Kyala am-beele ukujibomba ukukongana ni ipyana lyake. ¹⁶ Imbombo ijo ko kaja mbombeli gwake Kilisiti Jesu ku bandu aba bakaja Bajuuta. Ngubalambilila iNdami iNunu, ukuti nje bo ulwa mpuuti uju ikubaninga umwe kwa Kyala, bo ulwa ikemo ilya kunkyela Kyala, ili lyelusigwe na Mbepo Mwikemo.

¹⁷ Po leelo, paapo ndungeene na Kilisiti Jesu, ngwituukifya imbombo iji ijaa kumbombela Kyala. ¹⁸ Une ndikujoba akandu kokoosa akangi, looli syene isi Kilisiti abombile ukwendela kumyangu, ukubapela aband u aba bakaja Bajuuta ukuti bantiilege Kyala. Aabombile bo ulo ku njila jaa masyu gangu na ku mbombo isi naasibombaga, ¹⁹ ukwendela mfwigo na mfimanyilo fingi, ifi naabombile ku maka agaa Mbepo gwa Kyala. Po leelo nsyungutiile kukuti bujo kukufumusya iNdami iNunu ijaa Jesu Kilisiti, ukwandila mu Jelusalemu mpaka nkiisu ikya mu Iluliko. ²⁰ Kuli syosa isi, ulubaatiko lwangu ko kufumusya iNdami iNunu kuno bakajimanya ingamu jaa Kilisiti, ukuti ndingiisa kujenga pa lwalo ulwa mundu ujungi. ²¹ Isi syosa sisimbigwe mwa Kalata uMwikemo ukuti,
 “Abandu aba bakaabuliigwe inongwa syake,
 bikwisa kummbona,
 na bandu aba bakaapiliike,
 bikwisa kummanya.”†

† 15:21 15:21 Bala kalata gwa Jeosaja 52:15.

Ɖlubaatiko ulwa Pauli ukujata mu Looma

²² Imbombo ijo jo iji jaaliisigiile kaa kingi ukwisa kumyinu. ²³ Looli liilino mmalile imbombo jangu nkiisu iki ndimo, kangi nsyukilwe ifyinja fingi ukwisa kukubajaatila uko. ²⁴ Akabalilo aka mbaatiike ukufika nkiisu ikya Sipanija. Po leelo ngusubila ukubajaatila bo ngwenda injila ijaa kubuuka uko. Bo mbuugile ukwangala na nuumwe, po ngwisa kusookangapo. Ngusubila ukukaba kumyinu ifya kunduula ukwendelela ni njila jangu.

Ɖlubaatiko ulwa Pauli ukutwala ifya butuuli ku Jerusalemu

²⁵ Looli nsumwike taasi ku Jerusalemu, ukuti mbatwalile ifya kubatuula abiitiki abaa kula. ²⁶ Abiitiki abaa nkiisu ikya ku Maketonija na ku Akaja, baalyagile kanunu ukusangula utundu twabo utwa kubatuula abiitiki abalondo abaa kula ku Jerusalemu. ²⁷ Abiitiki abo baabombile bo ulo nu lusekelo, kangi nalooli bikuboneka bikumeleligwa ukubatuula abalondo abo. Namanga abandũ aba bakaja Bajuuta bali mbuliilansi pamopeene na Bajuuta mu sajo isya mwa Mbepo Mwikemo. Po leelo bikulondigwa boope ukujã mbuliilansi pamopeene na Bajuuta mu sajo isya mu mbili.

²⁸ Bo mmalile imbombo ijo, ijaa kubapa ifya butuuli abalondo abo, po angubajaatila umwe nu kwendelela ukubuuka mpaka ku Sipanija. ²⁹ Mmeenye ukuti bo ndi kumyinu, Kilisiti ikwisa kubasaja fiijo pakabalilo akaa kwangala pamopeene, une na nuumwe.

³⁰ Baamyitũ ndwitiko, kũ maka agaa Ntwa gwitũ Jesu Kilisiti nũ lagano ulũ lukufuma kwa Mbepo Mwikemo, ngubapyelesya ni ndumbula jangũ joosa, mwijũlege pamopeene na niine ukũjiipuutĩla imbombo jangũ. ³¹ Muunyiipuutilege ukũti, Kyala aandindĩilege kũ bandũ aba batikũmmwitika Jesu abaa nkiisũ ikya mu Jutai, ukũti balingaafulasya. Kangi ukũti, abiiitiki abaa mu Jelusalemu bambilile ifya kubatũũla ifi ngubatwalila. ³² Bo isyo sibombiigwe, mbagiile ukwisa kũmyĩnu, Kyala linga iiganile. Angũja nũ lusekelo fiijo nũ kutũũsya pamopeene na nuumwe. ³³ Kyala ugwa lutengaano, ajege na nuumwe mwesa! Ameni.

16

Uruponio lwa Pauli kũ mundũ jumoojũmo

¹ Ngũlonda mummwambilile Foibe umwitiki mwiniitũ paapo mundũ nnunu. Umwene ntũũli gwa kipanga kya Kyala ikya mu Kenkeleja.

² Mummwambilile kanunu mu Ntwa Jesu, bo muno sikũlondeligwa kũ bandũ baa Kyala. Mumpepo ubutũũli boosa ubũ ikũlonda, paapo umwene joope abatũũlile fiijo abandũ bingi, fiijo une.

³ Mubaponiege Pilisika nũ ndũme Akwila, ababombeli biinangũ mu mbombo jaa Kilisiti Jesu. ⁴ Abeene bakaabũpaasiisye ubũũmi bwabo kũnongwa jangũ. Ngũgwa ulũpi fiijo kũmyabo, ngaja jo une niimwene

itolo, looli na bandu abaa mfipanga ifya Kyala ifya mfiisu ifingi.

⁵ Kangi mubaponiege abiiitiki aba bikwaganila mu nyumba jaabo.

Mumponiege Epeneti ukundwe, uju aali gwa kwanda ukummwitika Kilisiti kula nkiisu ikya Asija.

⁶ Mumponiege Malija, uju aaliijualile fiijo kunongwa jinu.

⁷ Mubaponiege baa Andilonika na Junija abajuuta biinangu, aba baapinyiigwe pamopeene na niine mu nnyololo. Abo baatalilepo kumyangu ukummwitika Kilisiti, kangi bikwimikigwa fiijo mbatumigwa.

⁸ Mumponiege Ampilyati, ukundwe gwangu mu Ntwa Jesu.

⁹ Mumponiege Ulibani, umbombeli mwiniitu mwa Kilisiti, pamopeene na Sitaki, ukundwe gwangu.

¹⁰ Mumponiege Apele, uju aalyendiile mu ngelo inyingi kunongwa jaa Kilisiti.

Mubaponiege abandū abaa nnyumba ijaa Alisitobuli.

¹¹ Mumponiege Elotyoni unjuuta mwinangu.

Mubaponiege abandū abaa nnyumba ijaa Nalikisa, aba bammwitiike unntwa Jesu.

¹² Mumponiege Tilifena na Tilifosa. Abakiikulu abo bikwijula fiijo ukubomba imbombo jaa Ntwa.

Mumponiege Pelisi ukundwe, unkiikulu uju joope aaliijualile fiijo mu mbombo jaa Ntwa.

¹³ Mumponiege Lufu, unsunguligwa ugwa Ntwa, kangi mumponiege unna, uju

aaliimbombiile bo ulwa mwanaake.

14 Mumponiege Asinkilita, Filegoni, Elime, Patiloba na Elima, na biitiki boosa aba bali pamopeene nabo.

15 Mubaponiege Filologa na Julija, Neleju ni ilumbũ, na Olimpa, na biitiki boosa aba bali pamopeene nabo.

16 Namuponaniege kũ lugano ulwa nalooli. Abiitiki boosa abaa mfipanga ifya Kilisiti ifya kũno bikubaponia fiijo.

Isya kubasoka nũ luponio lwa kũmalikisya

17 Baamyitũ ndwitiko, muje maaso na bandũ aba imanyisyo syabo sikubapela abiitiki ukutapukana, nũ koonanga ulwitiko lwabo. Mujege patali nabo, namanga imanyisyo syabo sikupingana na isi mwamanyisiigwe.

18 Sya bwanalooli, abandũ abaa lũko ulo batikũmbombela uNtwa gwitũ Kilisiti, looli bikulonda syene isi basiganile. Bikujoba inongwa isya kutengulila, looli ngimba bikubasyoba abiitiki aboonywa ndwitiko.

19 Boosa bapiliike ukuti umwe mulikolile kanunu iisya ilya Kyala. Isyo sikũhobosya fiijo une, leelo ngulonda mujege na mahala mu mbombo inunu, kangi mulingakwabigwaga nũ butulanongwa. 20 Kyala ugwa lutengaano ikuntakania Seetano nũ kuntola loosa paasi pa malundi giinu. Hiiipyana lya Ntwa gwitũ Jesu lijege na nuumwe.

21 Ikubaponia Timoti umbombeli mwinangũ. Kangi bikubaponia baa Lukio, Jaasoni na Sospateli, abajuuta biinangũ.

22 Na niine Teliti, ne nsimbi gwa kalata ujũ ugwa Pauli, ngubaponia mu ngamu ijaa Ntwa Jesu. 23 Ikubaponia Gajo ujũ mu nyumba jaake mo muno ngũtũgala, kangĩ mo muno abiiitiki abaa nkipanga kyosa kya Kyala bikwaganila. Kangĩ ikubaponia Elasiti umbiika ndalama sya kaaja akaa mu Kolinti. Joope Kwaliti umwitiki mwiniĩtu, ikubaponia. [24 Iiipyana Iya Ntwa gwitu Jesu Kilisiti Ijige na nuumwe mwesa. Ameni.]*

Pauli ikũntuufya Kyala

25 Kyala atuufigwege! Ujũ abagiile ukubakasya ukwendela mu Ndũmi iNunu ijaa Jesu Kilisiti, iji ngũlumbĩlĩla. Indũmi ijo ijolo jaafisiigwe, looli akabalilo aka jisetũliigwe. 26 Kyala ugwa bwila na bwila aalagiile ukuti indũmi ijo jisetũligwe ukwendela mwa Kalata umWikemo. Kangĩ ukuti abandũ abaa mfiisũ fyosa bajimanye indũmi ijo, bammwitike nũ kũmmwimika.

27 Po kũ njĩla ijaa Jesu Kilisiti, tũntuufyege mwene Kyala ugwa mahala goosa. Ajege nũ busisya bwila na bwila! Ameni.

* **16:24** 16:24 Baakalata bamo abaa ijolo bakaja na kanandi aka.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

14ff4521-53e4-562c-aacb-6f4faf55a6c8